

# RE RATA HO BONA JESU



Ke a leboha, moena. Le ka lula fatše. Ruri ke monyetla ho fihla mona Grass Valley bosiuung bona, ho emela Morena le Mopholosi oa rona, Jesu Kreste; ho rapella bana ba Molimo ba kulang, mokuli oa Ngaka; le ho natefelo a ke setsoalle sena 'moho, matsatsing ana a mahlano ao re a tšepisitseng.

<sup>2</sup> Ke tlisa litumeliso ho tsoa ho bajaki bohle libaka tse fapaneng tsa lefatše moo ke bileng teng. Le ho tšepa... 'Me likete tse ngata tsa batho li rapella katleho ea kopano ena mona, masiuung ana. Ke na le bonnete, 'moho ka lithapelo tsa ba bang bohle, le rōna 'moho, hore Molimo o tla kopana le rōna le ho re hlhohonolofatsa.

<sup>3</sup> 'Me joale ha re tle joale ho emela kereke efe e ikhethileng, kapa ha re tle ho ipitsa "bafolisi." Re tla, re emetse Kreste. 'Me re tla, hape, e seng ho folisa bakuli, empa ho rapella bakuli, le ho etsa seo re ka se khonang ho thusa ho bebofaletsa e mong le e mong bophelo. 'Me ke na le bonnete ba hore le tla ba tlhohonolofatso ho rona. 'Me re tšepa hore re tla ba tlhohonolofatso ho lona.

<sup>4</sup> 'Me joale ke ne ke nahanne, ho tloha re ile California leetong lena la ho qetela, ke hore batho ba rata ho fihla hae pejana. Joale, lapeng, le libakeng tse fapaneng, likarolo tse ngata tsa naha, u fumana batho ba fapaneng. Ba bang ba bona, ba rata ho u utloa ha u rera; ha ke tsotelle le haeba u sa rapelle bakuli, u ba lulisa lihora tse 'ne kapa tse hlano feela, u rera, hoo—hoo ho ba khotsofatsa hantle feela. Empa mona, ho utloisa bohloko ruri; ekare feela bona, "Thero e khutšoane feela, le ho rapella bakuli, 'me ha re khutleleng hae ka potlako hoba ke tlameha ho khutla hape." 'Me ntho e 'ngoe le e 'ngoe e bonahala e potlakile haholo mona. Re ea kae bohle? "Potlaka, potlaka, potlaka, potlaka, potlaka!" Eakaba, ha Morena a rata, ke batla ho rera ke sa le mona, *Ho Imolla Khatello*. Ke hopola ho—hoo re lokela ho etsa seo, ho theola moea.

<sup>5</sup> Ke sa tsoa hlheloa ke kotsi, liveke tse 'maloa tse fetileng. Ke rata ho thunya tekele, ho tsoma. Ke sa tsoa fuoa e—e sethunya, se chekiloeng bocha ke K'hampani ea Weatherby tlase mona. 'Me ka se beha, ho thunya, eaba se phatloha sefahlehong sa ka. 'Me sa phatlolela moqomo lijarete tse ka bang mashome a mahlano, ka pela ka, le kutu ea sona sebaka se batlang se lekana ka morao ho 'na, 'me sa phatlola lihlahla le ntho e 'ngoe le e 'ngoe e mathokong, moo se phatlohileng teng. 'Me ke mohau oa Molimo feela ha se sa mphaltola ka ho tsoana, hoba se ne se atametse leihlo la ka *hakaalo* ha se qhoma, sefanyehi, phahamisa telesekoupu, ho thunya.

<sup>6</sup> 'Me ka thola mohopoloana ka eona. U a bona, e—e sethunya ruri e ne e se sethunya sa Weatherby. Se ne se chekiloe feela ho ba sethunya sa Weatherby. E ne e le moetso oa Winchester-mashome a supileng, ho lona mathaka a tsomang. 'Me ke se fuoe ke moena ea lokileng oa California ea bitsoang Art Wilson. O se file mora oa ka, Billy Paul, Roberts ea moetso oa peli-mashohlano-supu. 'Me ka hona ba . . . Billy o leqejana, 'me a sa khone ho se sebelisa, ka hona a re, "Ntate, ke tla u fa sona feela."

<sup>7</sup> Be, esale ke—ke batla sethunya sa Weatherby, empa ke ikutloa ke sa khone ho se reka. 'Me efela metsoalle ha e ntheketse sona, nka be ke sa batla hore ba etse joalo, hobane ke sethunya se theko e holimo. 'Me joaloka ha ke boletse khafetsa, "Ke na le metsoalle ea boromuoa ba sa roalang lieta maotong 'me nke—nke ke ka lumella motho ho lefella hakaalo, hore 'na ke tsome kapa ho thunya ka sona, athe ke na le metsoalle e se nang lieta." Ka hoo, nke ke ka e etsa feela.

<sup>8</sup> Empa motsoalle oa ka a re, "Nka se fetola moetso oo oa mashome a supileng 'me ka o etsa sethunya sa Weatherby. Weatherby e etsa hoo mono, 'me e etsa karanti." Ka re . . . Ho re ha nqose litšenyehelo, lidolara tse ka bang "leshome, leshome le metso e 'meli feela."

'Me ka re, "Tsoela pele."

<sup>9</sup> Ka hoo a nehela sona, a se isa k'hamphaning 'me ba se borela bocha. Pele, sa phatloha feela. Ka baka leo e ne e se eona, e sa tsoanela . . . Ntho e nang le khatello kae-kae.

<sup>10</sup> Joale thuto ea ka ka hono ke ena. Le a bona, khatello ebiler ngata haholo, sa phatloha. Ua bona? Ha re batle khatello e ngata, e—e tla phatloha.

<sup>11</sup> 'Me ntho e 'ngoe, ke rata ho bua sena, ekaba ntlha ea thuto. Ua bona, holane sethunya seo se qaliloe diforomong, e le Weatherby magnum, se ne se ke ke sa phatloha. Empa, le a bona, e ne e le ntho e fetotsoeng hanyenyane feela, 'me ke lona lebaka se sitiloeng ho mamella khatello.

<sup>12</sup> 'Me kea lumela hore borapeling ha re qamachise letho. Re a shoa 'me re tsoaloe labobeli, e be re Bakreste ba ka mamellang khatello eohle eo Moea o Halalelang o batlang ho e susumetsa. Ka hoo ke—ke nahana re tlameha ho khutlela qalong, eseng feela ho leka ho etsa ntho e seng eona. Kajeno re fumana borapeli bo bongata ba maikutlo a moea, sebakeng sa boiphihlelo ba 'nete ba ho tsoaloe labobeli le Molimo. 'Me kahoo kae-kae tseleng ho tla hlaha nthoana, e tla lutlisa lethoana, 'me e khutlise khatello e phatlohe, 'me u tla iphumana u phatlohile. Ka hoo re lumela u ehlile u lokela ho shoa bouena ba hau le mehopolu ea hao kaofela le tsohle tse ling, ho shoa feela le ho lumella Moea o Halalelang ho u bopa bocha. Feela, u—u Mokreste ea tsoetsoeng bocha, ke sona seo u leng sona, ho fumana boiphihlelo le Molimo ho tseba

hobane u tlohile lefung ho kena Bophelong. 'Me ke seo re se lumelang.

<sup>13</sup> Re lumela Biblele, 'me re lumela hore Eo ke Buka ea Molimo. Rōna, re tiisetša feela Biblele hantle. Joale, ke lumela Molimo o ka etsa lintho tseo O sa li ngolang Bibeleng. Joale, Ke Molimo, A ka etsa sohle seo A se batlang. Empa ha feela nka 'Mona, bophelong ba ka, a etsa seo A se tšepisitseng, ke tla tseba hobane e lokile, le a bona, ha feela e le ka Bibeleng.

<sup>14</sup> Joale, ka Testamenteng ea Khale, joaloka ha baena ba bareri ba tseba, hore ho—ho boprīsta ba Levi, mokhoa oa ho tseba haeba moporofeta a bolela 'nete, kapa toro ea molori e ne e nepahetse. Ba bolokile seo ba se bitsitseng Urime le Thammime. Joale, esale ho ngangisanoa hore e ne e le eng. Empa ntlha e molaong, e kholo ka ho fetisisa le e loketseng hantle eo ke e bonang, le tsela e loketseng ka ho fetisisa, e ne e le, ba nkile setšireletso sa sefuba se apesitsoeng Aarone; se emetseng meloko e leshome le metso e 'meli ka majoe a tsoalo a merabe, 'me se fanyehiloe ka tempeleng, holima palo. 'Me enere ha moporofeta a porofetile, 'me ba ka tseba e le 'Nete, kapa che; joale, haeba pokellano eo ea maseli e ka halima mono, ho etsa Mohlolo. Molimo ke Mohlolo, hobane Ke Molimo, Moea. 'Me haeba Leseli leo le Mohlolo le bapisitsoe mono, joaloka mookoli o halimang ho tsoa ho sena, ka hona lentsoe, moporofeta o ne a nēpile. O supiloē joalo, kapa molori o ne a nēpile. Empa haeba a sa halime ho Urim le Thummim, joale ho sa tsotellehe e utloahala e le 'nete hakae, ba ke ke ba e amohela, hobane ha e a halima ho Urim le Thummim.

<sup>15</sup> Joale, boprīsta ba Levi bo khaolitse lefung la Morena Jesu. Joale re phela ho Boprīsta ba Melkisedeke, Krete. Re ntse re na le Urim le Thummim joale. Ena ke Eona joale, Biblele. Ua bona, re tšoanela ho lula Lengolong (eseng ho itlhaloetsa Lona) hantle feela ka moo E ngotsoeng kateng. Joale, ke lumela hore—hore Molimo o tla ahlola lefatše tsatsi le leng ka Jesu Krete. Ke lumela seo. Ke—ke lumela ho tla ba le sekala seo A tla ahlola ka sona, hobane lintho tse emetseng Krete li ngata hakana, le tse tse ngata.

<sup>16</sup> Joale, motheo oa ka, Irishi, batho ba hesō e ne e le Makatolike. Ke sa le moshanyana; mohlomong le balile pale ea bophelo ba ka, e fumanoa mona ka har'a libuka, joalo-joalo. Ka theohela kerekeng ea Irishi 'me ka utloa seo moprista a neng a se bua. Eaba ke ea kerekeng ea Luthere, ka utloa seo a n'a loketse ho se bua, molisa oa Luthere. 'Me ho bile le Mobaptise e monyenyanane kae-kae morao koo molokong oa rona, kahoo ba . . . ka ea kerekeng ea Baptise. Ka ile likerekeng tse fapaneng. Be, bao, e 'ngoe le e 'ngoe, a fapane le e 'ngoe. Joale, e 'ngoe le e 'ngoe e batla ho itlaleha kereke eo e nēpile hantle.

<sup>17</sup> Ka hona, joale, kaofela ha tsona li ke ke tsa loka, phosa e tlameha e be kae-kae. 'Me joale ke fumana, ho le mekhatlo e ka

bang makholo a robong le ho hong e fapaneng, ka hoo ke hopola phoso e tlameha ebe teng kae-kae. Hobane, haeba sena, kaofela ha bona ba kena ka kereke *ena* . . .

<sup>18</sup> Joale re boletsoe, joaloka Makatolike, hore—hore—hore “Molimo o kerekeng ea Oona. ’Me ke hona moo Molimo o leng teng, ka kerekeng ea Oona.” Ka hona haeba Molimo o le ka kerekeng ea Hae, ke efe ho tsona e leng kereke ea Hae? E ’ngoe le e ’ngoe ea tsona e ipitsa “kereke.” Kahoo ke tsebile ntho e le ’ngoe . . . Joale ke seo moprista a se buileng feela, “Molimo o kerekeng ea Hae.”

<sup>19</sup> Empa Bible e itse, “Molimo o Lentsoeng la Hae.” ’Me A re, “Ekare ha e mong a eketsa letho ho Sena, kapa a fokotsa letho ho Sona, le eena o tla tlosoa Bukeng ea Bophelo, kabelo ea hae.” Ka hona ke lumela ka pelō ea ka eohle hore Lentsoe Lena ke Molimo ka sebopeho sa mongolo. Joale, lebaka la ka la horialo ke hobane ha ho motho ea fetang lentsoe la hae, ha a fetise lentsoe la hae. Ha u sa khone ho nka lentsoe la ka ka letho, joale se amane le ’na ka letho, u a bona, hoba u ke ke ua lumela ho ’na. ’Me ho a tšoana, ke tlameha ho lumela hore Lena ke Lentsoe la Molimo, ’me ke etsa joalo.

<sup>20</sup> Joale Bible e boletse, ho Santa Johanne, khaolo ea 1, “Lentsoe le ne le le tšimolohong, ’me Lentsoe le ne le le ho Molimo, ’me Lentsoe e ne e le Molimo. ’Me Lentsoe le ne le etsoe nama la aha har’a rōna,” ha ho le joalo E ne e le Kreste, ’me Kreste ke Lentsoe. Ka hona haeba A ahlola lefatše ka Kreste, e tlameha ho hlahisoa ke Lentsoe. Ua bona? Kahoo, re E lumela joalo, le thutong ea rona.

<sup>21</sup> Joale re tla ba le nako e khutšoane feela, re tsoe kapele . . . Ke eng ea bona, ruri ka nako, baena, ea ho tsoa mona, ha e batla e ba hora ea bobeli kapa ntho e kang eo? Huh? Hora ea bobeli? Ba tšeha, ke a kholoa ka mashome a mararo ka morao ho robong kapa mashome a mararo ka morao ho robong, ntho e kang eo, ka tloaelo ke nako ea ho tsoa. E tla ba metsotsong e ka bang mashome a mararo le metso e mehlano.

<sup>22</sup> Bosiueng bona, ke moeti har’a lōna, koana ha ke ikutloe ke le moeti. Ke ikutloa ke le moena oa lōna. ’Me joale ke batla hore le sale seo ke se buang Lengolong morao. Joale Molaetsa o ka ’na oa fapana le seo esale le se lebeletse, empa u e hlahlobe ka Lengolo. E tla khamisana hantle le seo le se utloileng. Ke tla E bala Lengolong feela, ’me ke se leke ho E hlahosa, ho E lesa ho Itlhalosa feela.

<sup>23</sup> Joaloka ho rekisa sehlahisoa. Ha u rekisa sehlahisoa, haeba se lokile, se tla ithekisa. Ha u hloke ho se bapatsa haholo. Ke fumane lipapatso tse ngata tsa linyee tseo, hoo ke—ke potoloha, ho bona . . . bohle ke “monna oa hora ena,” mme “*ona* ke molaetsa,” le tseo tsohle, ho fihlela ke ipotsa hore ke mang. Oh,

ke a lumela hore Kreste ke Monna oa hora, 'me esale ho le joalo. Le e—e mekhabiso e mengata le lintho tse joalo ha li a lokela.

24 E kile ea nkhitla khetlo le leng. Ho lona likhahitseli . . . Ke—ke na le mohatsa ka, o teng mona le rona, 'me ke hlile ke a mo rata le bana ba ka. 'Me ka mehla ke batla ho mo thusa, 'me ke letsoho le fokolang haholo ho thusa. 'Me ke ne ke . . . Ke a tseba hore o tlameha ho etsa tse ngata, le bana, ho lokisa tsohle, ho ea robala bosiu ha ke le hae. Ka hopola ho mo thusa ho hlatsoa lijana, empa ke hloile ho li hlatsoa hampe joaloka lona. 'Me ka nahana, "Helang!"

25 'Me 'mè o ne a nkemisa lebokosaneng la ho hlatsoa lijana ke sa le moshanyana, 'me ka nahana, "Ha nka nyala le ka mohla, ke tla tela mokhoa oo hona joale."

26 Empa ke ena, ke rata mohatsa ka kamoo ke ratileng 'mè oa ka, joaloka mohatsa ka feela, le 'mè oa ka. Eaba ke a nahana, "Be, ke tla mo thusa ha nka khona."

27 'Me ke bone ntho e itseng lenaneong khetlo le leng, e—e lenaneo la thelebishene, teng ke emetse e—e sefofane ho tsoa, 'me ba behile thelebishene kantle mono e sefahleho se sehola, sa khalase e kholo ho eona, 'me ea re, "Sebelisa sesepa sena se itseng, ha u hlatsoe, ho tsokotsa, ho hlakola, kapa ho etsa letho. Se sunye feela metsing, se inele, se inole, ke pheto feela seo u lokelang ho se etsa."

28 Ka nahana, "Uh-oh! Ruri mohatsa ka o tla nthata ho tloha joale ho ea pele, hobane ke tl' o mo bontša mokhoa oa ho hlatsoa lijana." Ka hona, ka iphumanela lebokose la sona, tsatsi le hlahlamang ha ke fihla hae. Ka iphumanela lebokose pele ke fihla hae, ka le kenya tlasa jase ea ka, 'me ka kena.

29 Hoseng ho hlahlamang, ka re, "U se tšoenyehe, moratuo. Ke mona hantle ho u etsetsa lijana. Ke phet feela seo u lokelang ho se etsa. Joale, tsoela kantle feela, u nke lefielo 'me u qale ho sebeta. Pele ke ea ofising kapa ke qala ke etsa mehala, ke tla be ke qetile ho hlatsoa lijana ka potlako."

30 Ka hoo ka nka ntho ena, ka e bala, u a tseba, "Tšela likhabana tse peli." 'Me ka nahana, "Khele, ke tla etsa mosebetsi oa 'nete ka sona," ka tšela nka—nka re halofo ea lebokose ka mono, ho se fehla *joalo*; ho lata lijana tsohle ka li seta joalo, lekoeba la phophoma *hakaalo*. Ka nahana, "Monna, metsotsong e 'maloa feela joale, 'me sohle seo ke lokelang ho se etsa ke ho li ntša le ho li beha tafoleng hape." Bana ba ne ba jele mahe borakefese; ka li ntša, 'me mahe a khenathetse feela joalo ka pele.

31 Ka hona ka re, "Ha ke bona ntho e bapalitsoe hakana, ke e feta mohaalotso feela, see khathatse, hobane ke a tseba hoba ha e ea sebeta."

32 'Me ka linako tse ling ke hopola re bua ka Jesu feela le ho lumella batho ho bona hore na Ke Mang, le seo—seo A leng sona,

'me ke lumela hore e tla . . . O, O tla etsa tse ling tsohle. O tla etsa hoo, O tla Itlisa, hobane, "Bohle bao Ntate a 'Neileng bona ba tla tla ho 'Na, le ha ho le joalo." Lea bona, ke seo Jesu a se buileng. "'Me ha ho ea ka tlang a sa bitsoe ke Ntate oa Ka pele." Kahoo ntho feela eo re e etsang ke ho lema Peo, ebe re a e tlohela.

Joale, ke tšepa hore le tla nka mehala le letsetse batho.

<sup>33</sup> 'Me ntho ea sehlooho mona ha se ho rapella bakuli joale, eo ke e 'ngoe ea lintho tse kathoko, empa taba ea sehlooho ke hore moetsalibe e mong le e mong a tsebe Morena Jesu e le Mopholosi oa hae. Ke eona sehlooho. Sa bobeli, ke ho fumana motho e mong le e mong ea amohetseng Krete joaloka Mopholosi oa bona, 'me a eso tlatsoe ka Moea o Halalelang, hore ba tlatsoe ka Moea o Halalelang. 'Me eo—eo ke ea bobeli. Hape ntho ea boraro, ke ho rapella bakuli bohle bao re ka ba rapellang. 'Me, ka seo, re tšepa Molimo o tla re fa nako e monate khabareng ea kopano ena. 'Me ke nahana hore mantsiboea a mang le a mang, le thapama ea Sontaha, ke nahana, hore ho—ho lokile.

<sup>34</sup> Ke batla ho leboha baena besō mona, bareri, ka ho 'memela mona. 'Me ke leboha Molimo ka tataiso ea ho tla mona. Joale, mookameli mona, Mongh. Borders, re ne re tšoare buka e tletseng limemo lefatše ho pota, empa ka mokhoa Ntho e buile le 'na mabapi le Grass Valley.

<sup>35</sup> 'Me hang, motsoalle oa ka, lelapa la Arganbright tlase mona tikolohong ea Los Angeles, a ntetsetsa 'me a re, "Haeba ha u eso hlophise lenaneo la hao la maeto ka botlalo o feta, ekare u ka feta Grass Valley."

<sup>36</sup> Ka letsetsa mookameli, ka mo beha mohaleng, ka re, "Na u se u fetile moo?"

"Che."

Ka re, "Kena ka hare." 'Me ke rōna bana.

<sup>37</sup> Joale seo Morena a tlang ho se etsa, ha ke tsebe. Mona A ka tšoha a emetse motho a le mong, ho tla. Ke tšepa e le sechaba sohle seo A tlang ho se pholosa.

<sup>38</sup> Joale, tabeng ena, ha re inamiseng lihlooho tsa rōna re bue le Mongoli pele re bala Lentsoe la Hae.

<sup>39</sup> Ntata rona ea Maholimong, ruri ke monyetla 'ona, ho ema ka pel'a Sefahleho sa Hau, horeng ena e phethelang nalane ea lefatše lena, le ho U bitsa "Ntate," le ho tseba hore re—re tla ho Uena ka Mokhoa o bokhoni, ka tiisetso e bokoang ea hore Jesu, Mora oa Hao, o itse, "Ha le kopa Ntate eng kapa eng Lebitsong la Ka, Ke tla e etsa, e tla abjoa." Ka hona re a tseba, Ntate, ha re kopa ka Lebitsong la Morena Jesu, hore re tla abeloa kopo ea rona. Joale ha re batle ho kopa letho le khahlano le thato ea Hau. Empa re a lumela, ka mora hoba U re tataise mona, ke thato ea Hau ho pholosa batho, le ho folisa batho, le ho tlatsoa batho ka Moea o Halalelang, le ho Ithuela khanya. 'Me re mona ho etsa sohle seo

U re etellang pele ho se etsa. Ka hona ke a rapela, Ntate, hore U re senolele Lentsoe la Hao, le thato ea Hau, ka Lentsoe la Hau, re tle re tsebe seo thato ea Hau e leng sona ka Lentsoe la Hau. Re hlohonolofatse 'moho joale. Tšoarella libe tsa rōna.

<sup>40</sup> 'Me bosiung bona, ha re ntse re iketla moahong ona, re rapela hore U hlohonolofatse moaho ona. Molimo, mohlomong ke arena, empa joale e nehetsoe tšebeletso ea Molimo o Matlaohle, ho ba ntlu ea kereke moo hlomphe le lerato le tlotla li abetsoeng Eamatlaohle. Aba sena, Morena, hore motho e mong le e mong ea fetang menyakong ena matsatsing ana a mahlano kapa a tšeletseng a tlang, o tla oeloa ke kholiseho hakaalo ba ke ke ba tsoa moahong ba sa nehela lipelo tsa bona ho Krete.

<sup>41</sup> Rea rapela, Ntate, hore motho e mong le e mong ea kulang ea kenang ka moahong ona, le ba tsamaeang ba hopotse ba bang lipelong tsa bona, ba rapela, hore Morena Jesu ea lehlohonolo o tla ba teng ho folisa ba kulang. Tlatsa pelo ea e mong le e mong ka Moea o Halalelang.

<sup>42</sup> 'Me, Molimo, ba ntše ka har'a lefatše lena le tahiloeng, le hlanyelitseng sebe, le ratang menate, pele eba morao haholo, pele lithaba li batalatsoa, pele khalefo e kholo ea Molimo e tšolleloa holima moloko o sa lumeleng. Molimo, e tlise haufi le rona vekeng ena hore re tle re e bone, 'me lipelo tsa rona li tla be li tletse hona, hoo motho e mong le e mong ka mona etlaba moreri seterateng le tikolohong, ho tliša ba bang ho Krete.

<sup>43</sup> Ha re tsebe haeba re tla qetella tsoseletso mona, kapa che, ho fihlela U fihla. Empa re tseba ntho e le 'ngoe ena, hore U tla tla ka letsatsi le leng, 'me ha re tsebe e tla ba hora efe. Empa re pheleng hora ka 'ngoe, haeba e ne e le hora eo, re tle re itokiselitse ho ema ka pel'a Sefahleho sa Hau, ho utloa ho thoe, "U sebelitse hantle, mohlanka oa Ka ea lokileng le ea tšepehang; kena menyakeng ea Morena, e lokiselitsoeng uena esale ho theoa lefatše." Re a inehela, 'moho le moaho ona, le Lentsoe la Hau, tlotlisong le khanyeng ea Molimo, ka Lebitso la Jesu Krete. Amen.

<sup>44</sup> Morena a le hlohonolofatse. Joale re lakatsa ho bala Lengolo le itseng mona, le fumanoa Bukeng ea Santa Johanne, khaolo ea 12 le temana ea 20.

<sup>45</sup> 'Me mokotaba oa rōna—oa rōna ke ona, ho tabola... mokotaba oa rōna oa letšolo ke oo, "Jesu Krete esale eena maobane, kajeno, le kamehla." Joale, eo ke Baheberu 13:8, "Jesu Krete eena maobane, kajeno, le kamehla." Joale Santa Johanne 12:20.

*...ho ne ho ena le ba-Gerike har'a ba neng ba nyolohetse...moketeng:*

*Ba tla ho... Filipi, oa Bethesda, Bethsaida oa Galilea, 'me ba mo kopa, ba re, Benghali, re rata ho bona Jesu.*

46 Joale, ke lakatsa ho nehela puo e khutšoane, ea metsotso e seng mekae e tlang, ea motheo le kaletsa. Re tla qala, joaloka ha ho etsahetse, ka pholiso e Khalalelo. 'Me kamehla, Jesu, ke a lumela, tšebetsong ea Hae, karolo e ka bang mashome a robeli ea eona, e ne e le pholisong ea Khalalelo.

47 'Me joaloka motsoalle oa ka oa khale ea lokileng, Moena Bosworth, eo bongata ba lona Bakreste le mo tsebileng, o ne a tloetse ho re, "Kamehla uena, ha u tšoara hlapi, ha u li bontše selope, u li supisa khoheli. 'Me hlapi e phamola khoheli, e fihla selopeng."

48 Re leka ho tšoasa Bakreste joalo bakeng sa Kreste, ke ka mehlolo ea pholiso ea Khalalelo, ho bontša boteng ba Hae. 'Me hape, tabeng eo, ba tseba motho a ke ke a etsa lintho tseo, ka hona e tšoara moea oa molumeli, 'me o e amohela holima motheo oo. Ka hona joale, ho qalisa, ke batla ho hlahisa puo e reng esale Eèna maobane, kajeno, le kamehla.

'Me Bagerike bana ba itse, "Monghali, re batla ho bona Jesu."

49 Joale, Bagerike bao ba ka hlalosa mehopolo ea rōna hantle mona bosiueng bona. Ha ke lumele motho a le teng mona ea sa batleng ho bona Jesu Kreste. Ho fumana feela hore ba ba kae mona ba kileng ba utloela ka Eèna, ba ka ratang ho 'Mona, ke batla u phahamise letsoho la hau feela. Ua bona feela, ke liperesente tse lekholo. Ha ho motho ea utloetseng ka Eena. . . Ke Lebitsu leo le ratehang feela le etsa hore re labalabele ho Mo bona!

50 Taba e teng ho Kreste e seng ho motho e mong. O ne a fapane. E ne e le Mora oa Molimo. 'Me mono—ho teng ho fapaneng haholo ka Eèna monna e mong o bonahala a ne a se na se tšoanang le seo A na ena le sona. 'Me re na le Moea, utloisisa, empa re O tšoere ka tekano. O na le Oona ntle le tekanyo. E ne e le Emmanuele, Molimo o phelang 'meleng oa Kreste Jesu, Molimo o bonahalitsoeng nameng. Kreste e ne e le setšoantšo sa Molimo se bonahalitsoeng, ho bonahatsa Molimo ho batho. Seo Molimo o nong o le sona, ba se bone ka ho Kreste, Mora oa Hae. E ne e le Motlotsuo. Lentsoe *Kreste* le bolela "Ea tlotsitsoeng."

51 'Me joale haeba Bagerike bao, ba Mo batlang. . . Joale, joale ha re qotseng Lentsoe ka leng. Bagerike bao, ba neng ba batla Jesu, ba tlike ho e mong oa barutuo ba Hae, e leng Filipi, oa Bethsaida. 'Me o—o ne a batla Jesu, eaba o fihla ho morutuo, 'me morutuo a mo isa ho Jesu. Haeba oo e ne e le mokhoa oa ho bona Jesu, ho Bagerike bao, 'me re lakatsa ho bona Jesu eena eo, 'me Bible e re "Ke eena maobane, kajeno, le kamehla," hobaneng re sa khone ho Mo bona? Joale u. . .

52 Mangolo a ke ke a bua leshano. Ke 'Nete. Ke lumela seo. 'Me haeba Mangolo ana a ne a fosahetse, Joale nka be ke etsa ntho e 'ngoe bosiueng bona, ho ena le ho ema mona ke emetse Sena. Empa ke lumela hore A nepile, ho nepa hantle. Ha A hloke

tlhaloso efe. A feela kamoo A lokelang ho ba kateng, a ngotsoe hantle ka mona, Hobane Molimo o entse bonnete ba hore A tla lula a le joalo. Joale shebang.

<sup>53</sup> Ba bakae ba lumelang hore Molimo ke mohlokapheletso, eamatlaohle, motlalahohle, motsebatsohle? Ehlile. Joale, Ke Molimo, ka baka leo geto ea Hae ea pele holima ntho efe e tlameha ho tiisetša e tšoana, hobane liqeto tsa Hae li tla be li phethahetse, hobane A ke ke a etsa letho haese phetheho. Ke phetho seo A leng sona, ke phetheho. A ke ke a fetoha le ka mohla. Joale ke mona moo tšepo ea rona e thehiloeng holim'a Lentsoe. Haeba Modimo a ka biletsoa temeng, ho etsa geto maloka le taba efe, geto ea Hae ea pele e tlameha ho lula e tšoana. E ke ke ea fetoha le ka mohla. Pele feela re fihla mohopolong, nahanang ka sena.

<sup>54</sup> Mohla Modimo, serapeng sa Edene, A neng a biletsoa poloko ea Adama le Eva, O ne a tšoare pheko e le 'ngoe, e ne e le mali. 'Me ha O eso e fetole. Kamehla, ke—ke mali! A ke ke a e fetola le ka mohla.

<sup>55</sup> Mohla Molimo o ne o biletsoa, ho folisa monna ea kulang, O mo folisitše ka tumelo ea hae. 'Me A ke ke a e fetola le ka mohla. Le a bona? 'Me haeba A folisitše motho, ka lebaka la tumelo ea hae ho Molimo ho e etsa, O tla tlameha ho folisa ea latelang, ho seng joalo O sebelitše ka phoso mohla A ne a folisa oa pele, 'me O sebelitše ka phoso mohla A ne a pholosa oa pele. Le a bona? Kahoo u ke ke . . .

<sup>56</sup> Re a fetoha. Re—re seo le se bitsang, “se nang le pheletso.” 'Me Ke Mohlokapheletso. Ka hona A ke ke a fetoha, hobane O phethahetse. Re etsa geto, re a bona ke hona, “Be, seo se ne se fosahetse. Ke tla e etsa *tjena*, ho tla ba molemo ho feta.” Empa e seng Eèna. Ea Hae ea pele e phethahetse. E tlameha ho itulela e le joalo ka mehla. Ka hona A ke ke a ithuta ho feta kapa ho hlalefa ho feta, ka moo re nahanang, empa O phethahetse ho tloha qalong.

<sup>57</sup> Joale re utloela haholo ka Jesu matsatsing ana, le hohle moo le ka eang teng. Joale, ke moromuoa, le a utloisisa; lena ke lekhetlo la ka la bosupa ho potoloha. Joale, mona mosebetsing oa boromuoa, re fumana batho ba rapela lisêto le lintho tse joalo, 'me ke limilione tsa bona. Empa mona Amerika re fumana likereke sekhutlong ka seng, e 'ngoe le e 'ngoe e emetše Molimo ka tsela e itseng, 'me ba fupile maikutlo a fapaneng ka Eèna. Ba bang ba leka ho fumana Molimo ka tsela e 'ngoe, 'me ba bang ka e 'ngoe. Ruri tsela e nepahetseng e teng kae-kae. Eka khona ho be le tsela e nepahetseng kae-kae.

<sup>58</sup> Hobane, joaloka ha Davida a boletše, “Ha boliba bo arabelana le Boliba, eka khona, pele, ho be le ntho e arabelang pitso eo, ho seng joalo pitso e ka be e le sieo mono.” Ka mantsoe a mang, 'Mopi o tlameha ho ba teng pele popo e ka ba teng. Le

a bona? Ntho e 'ngoe e tlameha ho kenya popo ka ho uena, pele; Mohloli o lokela ho kenya popo ka ho uena, 'me ntho e tlameha ho arabela seo. Pele ho ba le—le—le lepheo mokokotlong oa tlhapi, metsi a ne tlameha a ba teng pele e tle khone ho sesa teng, ho seng e ka be e hlokile lepheo. Pele sefate se mela lefatšeng, lefatše la tlameha ho ba teng, pele. 'Me ha feela tlala e le teng pelong ea motho, bakeng sa Molimo, eka khona ho be le Molimo kae-kae ho arabela pitso eo.

<sup>59</sup> 'Me ba bangata ba teng mona bosiuung bona ba batlang pholiso ea Khalalelo. Hobaneng u e batla? Hobane ntho e teng ka ho uena e u bolellang, "Seliba se teng kae-kae." Le a bona? 'Me ha feela ntho e le teng ka ho uena, e u bolellang, "Seliba se teng kae-kae," eka khona Seliba seo se be teng, ho seng joalo takatso eo e ka be le sieo ka ho uena. Le a bona, 'Mopi, ho bopa popo.

<sup>60</sup> Joale re fumana batho mehleng ena, ba labalabela, ba hula, ba matha mona le mane, ba batla, ba phamola, ho fetola likereke, ho fetola lipampiri le mekhatlo e fapaneng, le joalo-joalo. Molato ke'ng? Ba lapetse ho Hong, empa ekare ha ba fumane seo ba se lapetseng. Ntho e tlameha e be teng kae-kae.

<sup>61</sup> Joale, kajeno ba bang ba batla Molimo ka litumeloana tsa bona. Batho ba bang ba nahana, ka litumeloana tsa bona, ba tla "Haola har'a tumeloana e itseng feela, hoo ho fumana Molimo." Ba bang ba nahana, "Ho ingolisa le malumeli a itseng, ho fumana Molimo."

<sup>62</sup> Hantle, Jesu o fihletse hona hoo mohlala A fihlileng lefatšeng. A fumana Bafarisi, Basadusi, le eng hape, litaelo tse fapaneng, kapa mekhatlo le litumeloana tsa letsatsi leo. O itse'ng ho bona? "Ka meetlo ea lōna le fetotse Melao ea Molimo ntho e se nang matla." Ua bona?

<sup>63</sup> Ke hopola re batla Molimo ka tumeloana kapa ka mekhatlo ea bolumeli, e etsa ho le hong feela, e lokisa ntho ka tsela e makatsang, e be u fumana e khutla hape 'me e latola Lentsoe, e khutlela morao 'me e fetola Melao ea Molimo ntho e se nang matla. Ho tea mohlala, u leka ho fumana Molimo ka ho thothokisa Tumelo ea Baapostola. 'Me u ntano khutla ho fumana Mareka 16 e le bonnete ho uena, "mehlolo e tla tsamaea le ba lumelang ke eona ena"; khele, ba tla u bolella ka pele, "Be, matsatsi ao a mehlolo a fetile!" Ka hona e etsa'ng? E nka Melao ea Molimo 'me e e fetola ntho e se nang matla; le a bona, ha e na matla, Melao ea Molimo.

<sup>64</sup> Molao oa Hae, e leng, "E-eang ka lefatše lohle le bolelle sebopuo se seng le se seng Evangeli." Joale, Evangeli ha ea tla ka Lentsoe feela, empa ka ponahatso ea Lentsoe, lipontšo tsa Moea o Halalelang tse phelisang Lentsoe. Le a bona, ke Moea o nkang Lentsoe.

65 Lentsoe e ne e le mohopolo. 'Me mohopolo ke . . . Lentsoe ke mohopolo o hlahisitseng. Le a bona? Joale, e ne e le mehopolo ea Molimo, seo A neng a tla se etsa, eaba O e hlahisa Lentsoeng.

66 'Me joale ha Moea o Halalelang o tsoara Lentsoe, O a Le phethahatsa le ho Le bonahatsa, ho Le etsa 'nete, Lentsoe le leng le le leng la Molimo. Ha ho Lengolo le sa abjoang ka pululelo! 'Me Lentsoe le leng le le leng la Molimo le phethahetse ebile le lokile, 'me Le tla phethahatsoa. Lentsoe le leng le le leng le tsoanela ho phethahatsoa. "Maholimo le lefatše li tla feta," Jesu o boletse, "empa Mantsoe a Ka a ke ke a hloleha." Lentsoe le leng le le leng la Eona le tsoanela ho phethahatsoa.

67 Joale, ha Molimo a etsa hoo, 'me re fumana tumeloana ea rona ka nako eo, haeba re tumisa litumeloana kapa tseo re leng karolo ea tsona ho . . . 'Me ha ke na letho khahlano le hoo. Ho lokile.

68 Ho tsoana feela le ho ja lehapu, joaloka ha monna oa 'mala a boletse mohla a jang sekotoana sa lona. A re, "U nahana'ng ka lona, Mose?"

69 A re, "Le ne le le monate, empa ruri le leng le sa le teng." Ka hona, le ne le sa lekana ho khotsofatsa.

70 Tumeloana e itoketse, empa ha e khotsofatse ho fihlela u fihla Lentsoeng. "Me motho a ke ke a phela ka bohobe feela, empa ka Lentsoe le leng le le leng le tsoang molomong oa Molimo." Ke seo motho a tla phela ka sona. Lentsoe la Molimo ke Bohobe ba moea ba motho letsatsi ka leng, ke Lentsoe la Molimo le bonahatsoang.

71 'Me mohla Molimo o ne o neha Iseraele lefatše la pallo, enere ba sa le Egepeta, ba tlameha ho loanela sebaka se seng le se seng sa naha eo. Molimo o boletse Joshua, ho Joshua 1, "Hohle moo bohato ba maoto a hau bo hatang teng, boo Ke le neile bona hore e be lefa la lona." Ka baka leo, *mehato ea maoto* e bolela "lefa." Batho ba bang ba ka fihla feela, ba fihla e—e ntšing tsa lefatše ka lenqe-nqe. Ba bang ba ka tsoara Sabole e matsoho a mabeli 'me ba khethula Bafilista le Baamore ho fihlela ba hapa sohle. Ke seo re lokelang ho se etsa. Tšepiso e 'ngoe le e 'ngoe e etselitsoe rona. Re na le . . . Mehlala ea maoto ke lefa. Nyolohang hantle 'me le le hape! Molimo o re file eona. Ke tšepiso 'me ke 'Nete, 'me e etselitsoe rōna.

72 Joale, hape litumeloaneng tsena, ba fihla hape, joaloka ha ke bolela, 'me ba fetola, ka moetlo ea bona, Melao ea Molimo ntho e se nang matla. Ho etsa, ho e tlosa, ho e hlalosetsa eohle hlole.

73 Empa ruri eka khona ho be le mokhoa ho tseba 'Nete, hobane Lengolo mona le re, "Ke oa maobane, kajeno, le kamehla." Joale, u ke ke oa nka Lengolo leo 'me oa le ntšha Bibeleng. U tlameha ho e tlohela ka Bibeleng, hoba ke moo e loketseng teng. 'Me haeba E re, "O a tsoana," ha E bolele hore O tsoana kammoho, E bolela ho re "Esale Eëna maobane, kajeno, le kamehla."

74 Joale, hape, re batla ho bona. Ke rata ho 'Mona a kena moahong bosiueng bona. Ke rata ho 'Mona. Na le ke ke la rata? Re boletse nakoana e fetileng, re tla etsa joalo. Re rata ho 'Mona. Be, ka hona, haeba A re tšepisitse eona, hobaneng re sa khone? Hoo ke i- . . . Joale, ha re ka bula mahlo a rona le likelello tsa rona nakoana feela, ke lumela re tla utloisisa, 'me O tla kena a Iponahatse le rōna. Joale, re ka tloha bosiueng bona, ra re, "Re rata ho bona Jesu."

75 Ba fumane Jesu kae ka Testamenteng ea Khale; hantle ka har'a Testamente e Ncha, ke rialo? Hantle 'moho le Lentsoe, ka hoba E ne e le Lentsoe. Joale, E ne e se Lentsoe kamoo ba Le kopantseng ka teng, empa o ne A le Lentsoeng ka mokhoa oo Molimo o Le kopantseng 'moho, hobane E ne e le Lentsoe le phelang.

76 Joale, mohla A kopanang le Satane, O kopane le eèna Lentsoeng. E—E—E ne e le Molimo o bonahetseng nameng; empa mohla A kopanang le Satane ha A sebelisa Matla a Hae a—a Bomolimo ba Hae, seo A neng a le sona. A re, "Ho ngoliloe, 'Motho a ke ke a phela ke bohobe feela.' Ho ngoliloe, 'U tla khumamela Morena Molimo oa hao, 'me u sebeletse Eèna a inotši.'" Ha A kopana le Satane, O kapane le eèna ka Lentsoe, hobane E ne e le Lentsoe. Joale, Lentsoe le ne le etsoe nama la aha har'a rōna. Joale, Moshe o buile ka Eèna Lentsoeng, joale, ho Deutronoma, khaolo ea 18, temana ea 15.

77 Moshe o ngotse Libuka tse Hlano tsa Testamente ea Khale, Exoda le Genese; Genese, Exoda, Levitike, Deutronoma, Lipalo. O ngotse Libuka tse Hlano tsa—tsa Testamente ea Khale. Ka mono, ka pululelo e tsoang ho Molimo, o ngotse 'me a bolela se *neng* se le teng, eaba o ngola a bolela se *tlang* ho hlaha. 'Me seo a se boletseng se *tla* hlaha, se hlahile; ka hona re a tseba seo a se buileng e *ne* e le sona, ke 'nete. Hoba motho a ka sheba ka *mona* 'me a bona se etsahalang, 'me ehlile e a etsahala, le seo a se buileng morao *mono* ka sebele e ne e le pululelo.

78 Joale, Bajuda bohle ba ne ba rutiloe ho lumela baporofeta ba bona. Ba sa ntse ba etsa joalo. Joaloka ha Pauluse a boletse, "Bajuda ba batla lipontšo, le bohlale Bagerike, le joalo-joalo. Re rera Krete ea thakhisitsoeng."

79 Joale, Bible e ne e rutila Bajuda bao, "Ekare ha e mong hara lona e le motho oa moea, kapa moporofeta, 'Na Morena ke tla Itsebisa eèna. Le—le ka liporofeto le lipono, litoro, le lintho tse joalo, 'me ekareha seo a se buang se etsahala, le mo utloe." Joale, ke kelello feela eo. "Empa ekareha e sa etsahale joaloka ha a boletse, joale le se ke la mo utloa." Hobane, Molimo o ke ke oa bua leshano, Ke Molimo. Empa ha motho a bua taba, 'me e phethahala, 'me u e shebella e phethahala ka ho eèna, e etsahala, e etsahala, e etsahala, joale u a tseba hore e tla be be motho eo. E tlameha e be e le Molimo. Ka hona Molimo o boleletse

baporofeta . . . kapa, ho bolella Bajuda ho mamela monna eo, hoba e ne e le moporofeta ea romiloeng ke Molimo.

<sup>80</sup> Joale, Moshe e ne e le moporofeta e moholo. Ha re na nako ea ho kena ho eona, bophelo ba hae, ho bontša ka moo a bapisitseng Kreste kateng. Empa e ne e le moporofeta e moholo. 'Me a re, "Morena Molimo oa lona o tla le hlalishetsa Moporofeta ea joalo ka 'na. Ekareha e mong a sa mamele Enoa o tla khaoloa hara batho." Joale, joale haeba Moshe a buile, le baporofeta ba bang. . . 'Me Moshe, hopolang, o ngotse Genese, hape. Ho tloha tšimong ea Edene, "Peo ea mosali e ne e tla khoba hloho ea noha," le litšepiso tsohle morao mono tsa Messia ea tlang, Moshe o li ngotse. 'Me baporofeta ba bang ba baholo, joaloka Esaia, Jeremia, le ba bang, kaofela ba buile ka ho tla ha Messia. Baporofeta, etsoe, mantsoe a bona a phethahetse. Joale, ba buile 'me ba boletse E tla ba Moporofeta mohla A tlang. "E tla ba Moporofeta ea joaloka 'na," Moshe o boletse. Ke seo A tlang ho ba sona.

<sup>81</sup> Joale, haeba re batla ho bona Jesu kajeno, 'me Bible e itse, "Esale eèna maobane, kajeno, le kamehla," joale tsela e 'ngoe feela ea ho e etsa. Ha se . . .

<sup>82</sup> Ha re lahleleng tumeloana tsa rona kathoko nakoana, lebaka la hora, kapa halofo ea hora. Ha re behelleng litumelo tsa rona ka thoko, maikutlo a rona a likereke, joalo-joalo, ebe re khutlela morao ho fumana hore na E e ne a le mang. Joale na eo e ka ba . . . E ka ba ntho e utloahalang, na ha ho joalo? Ho tla ba hotle. E-eang le fumane seo A neng a le sona, 'me re tla tseba seo A leng sona ha re ka fumana seo A neng a le sona. Empa mokhoa o le mong feela u ka . . . Haeba E ne e le tumeloana morao koana, etlaba tumeloana e lokile. Haeba E ne e le mokhatlo oa bolumeli morao mono, joale hoo ho nepahetse. Fumana hoba e ne e le mokhatlo ofe kapa tumeloana efe.

<sup>83</sup> Empa re a fumana, nakong e fetileng E ne e le Lentsoe, ka hona E sa ntse e le Lentsoe. Joale ke bala ho tsoa ho Santa Johanne. Joale ha re ka phetla morao mona khaolong ea 1 ea Santa Johanne, 'me re tla qotsa a mang a Seo, seo A neng a le sona, ho qala ka khaolo ea 1 ea Santa Johanne. Joale re fumana hore, "Lentsoe le ne le le tšimolohong," joaloka ha ke se ke boletse, "'me Lentsoe e ne e le Molimo; 'me Lentsoe le ne le le ho Molimo, 'me Lentsoe e ne e le Molimo. 'Me Lentsoe le ne le etsoe nama la aha har'a rōna." Joale re fumana seo A neng a le sona. Joale re na le "Lentsoe ke Molimo," 'me "Molimo o entsoeng nama oa aha har'a rōna," matsatsing ao. Joale Bible e itse, "Esale eèna maobane . . ." E ne e le Testamente e Ncha.

<sup>84</sup> Ka hara Testamente ea Khale, Kreste, ea tšoanang. Kreste, ea tšoanang ka hara Testamente e Ncha. Le Kreste, ea tšoanang, ka mehla. Ka hona haeba re ka bona "seo A neng a le sona," ka

hona “seo A bileng sona,” le “seo A tlang ho ba sona,” re tla be re e fumane. Na ho joalo?

<sup>85</sup> Moshe o boletse, joale, “O tla ba joaloka ’na, Moporofeta ea joaloka ’na.” E be mohla A tlang, seo Kreste a *neng* a le sona, O ne a tlameha ho fetoha seo A . . . O tlameha ho fetoha seo A neng a le sona pele ho moo. Ka hona joale ha re qaleng hantle mono, ’me re tla bona seo A tlang ho ba sona ka mehla. Ke oona feela mokhoa oa ho e sebetsa.

<sup>86</sup> Èena maobane, joale mona, re fumana mongoli oa Moheberu, ke Pauluse, ho re, “Jesu Kreste oa maobane,” a bua le Baheberu. ’Me bohle re a tseba hoba Jehova oa Testamente ea Khale, e ne e le Jesu oa e Ncha, ’me ke Moea o Halalelang oa kajeno. Ke Molimo o le mong feela ea iponahatsang ka diofisi tse tharo tse fapaneng. ’Me, ka hona, ’ona Molimo oo! ’Me sohle seo Molimo o neng o le sona, O se tšetse ka ho Kreste, sohle seo Kreste a neng a le sona O se tšetse ka ho Kereke. Ka hona, le a bona, u ka fumana kapele seo A leng sona, “Èena maobane, kajeno, le ka mehla.”

<sup>87</sup> Joale, empa re tlameha ho fumana tlaho e Hae, seo A neng a le sona. Joale bohle re a tseba, ’me babali bohle ba Bible ba tla lumela, hore Topallo ea Mollo e latetseng Iseraele lefeelleng, kapa ba latetse Topallo ea Mollo, ke rialo, hore leo e ne e le Lengeloi la selekane le buileng le Moshe sehlahleng se tukang, eona Topallo eo ea Mollo. Lona, na le lumellana le seo? Bohle re etsa joalo. Be, Lengeloi la selekane ke Mang? Kreste. “Moshe o tsetse Egepeta, a lekanya sekhobo sa Kreste e le maruo a maholo ho feta a Egepeta.” Na lea bona?

<sup>88</sup> ’Me joale mehleng ea Hae mona lefatšeng, Topallo eo ea Mollo e ne e etsoe nama, ea aha hara rōna. Mehleng ea Hae mona lefatšeng, O itse, “Ke tsoa ho Molimo, ’me Ke khutlela ho Molimo.” Joale hopolang, “maobane, kajeno,” le a bona. O tsoa ho Molimo, ho tsoa ho Topallo ea Mollo, O khutlela ho Molimo.

<sup>89</sup> Joale, ka mora lefu la Hae, kepele, le tsoho. Saule oa Tarsese, tseleng ea hae e theohelang Damaseka, ho ea tšoara batho ba pentekosta, tseleng ea hae e theohelang mono, ho etsahetse’ng? Topallo ea Mollo, Leseli la mo otlala mo liha. Ha ho motho ea Le boneng. O ile a Le bona. La fougatsa mahlo a hae nakoana. E ne e le ’nete ho èena; mohla ba bang ba emeng mono, ba ne ba sa bone letho; empa E ne e mo fahla haholo hakana, ea mo fougatsa mahlo. ’Me A re, “Saule, Saule, u Ntlhorisetsa’ng na?”

A re, “U Mang, Morena?” Joale mamelang!

<sup>90</sup> “Ke ’na Jesu. ’Me ho thata ho uena ho raha litsenene.” Le sa e hopola. Be, ke Enoa, eona Topallo ea Mollo e *neng* e le teng.

<sup>91</sup> Ka hona haeba E le oa “maobane”; ka hona letsatsing la Pauluse, “kajeno”; E tla ba oa “kamehla”! Ka baka leo Topallo ea Mollo, Molimo, Lengeloi la selekane, e sa tšoana le kajeno joaloka mohla E entseng ha E eteletse Israele pele. Lemohang!

92 Joale re tlil'o qala tšebetso ea Hae, ho Santa Johanne 1. Re a tseba. . . Re tla tlola pitso ea Hae le tsoalo, le Johanne Mokolobetsi, 'me re ee kolobetsong ea Hae, ebe re kena lehoatateng, a lekoa ke liabolosi, ho khutla kamora matsatsi a mashome a mane le masiu a mashome a mane a ho itima lijo lehoatateng. A khutla 'me a qala tšebetso ea Hae. Joale ha re—ha re saleng tšebetso ea Hae morao mona. Hang-hang, batho ba qala ba folisoa ha ba rapelloa, ke Eëna.

93 'Me re fumana ho le monna ea bitsoang Simone, 'me o tlile ho Jesu ka memo ea moena oa hae, Andrease. 'Me eitse ha a kena ka pel'a Sefahleho sa Jesu. . . Joale hopolang, monna oa bohlokoa ke enoa a etla. Joale re a utloisisa, ho latela Liketso khaolo ea 4, hore e ne e le monna ea sa balang a sa ruteha. Re rutoa hore o sitiloe le ho saena lebitso la hae. Joale, e ne e se ralithuto. E ne e se mobishopo. E ne e se—e se moprista. E ne e le motšoasi oa lihlapi.

94 Kamehla Molimo o nka ntho e lefeela, le ho etsa ho hong ka eona. O Iponahatsa ka lefeela, hore mang le mang a tle a bone hore ke Molimo. Le a bona, O nka ntho eo e seng letho.

95 'Me O nkile monna enoa ea sa balang. Joale O tla etsa joang hore monna enoa a tsebe hore O teng? Hobane, ho hlahile maqiti a mangata a neng a etsahetse. 'Me re bile le ona ho tloha khale.

96 'Me nako efe ha u thola dolara ea maiketsetso, u sheba dolara eo ea maiketsetso, u hopole feela hore dolara eo ea maiketsetso e entsoe ka dolara ea makhonthe. Hoba hoja dolara ea makhonthe e le sieo, joale ea bohata e ne e tla ba e—e kopi ea ea mantlha. Le a bona? Ha u bona motho a etsisa kapa a bapala kabelo ea moikaketso, hopola feela Mokreste oa makhonthe o teng nqa e 'ngoe. Le a bona? U bona motho ea hlaisang tsamaiso e itseng ea bokereke ea e—e molimo oa bohata, kapa mokhoa o itseng oa—oa ho bala moea, oa bokereke, kelello e fuluoeng, hopola feela, ka morao mono, kae-kae, Molimo oa sebele o teng, oa makhonthe. Hlokomela. Oh, ke mpa ke e rata feela! Hlokomela.

97 Joale hang feela, hang hoba Simone. . . Ha re qotseng ketsahalong ea Simone, motsotso, a se a tsofetse. Ntata'e e ne e le monnamoholo, le hona. 'Me mohlomong tsatsi le leng, ha ke ntse ke bala pale ea hae; ntata'e e ne e le motšoasi oa lihlapi, 'me o ne a hulela kahare. Ba ne ba hloka lihlapi haholo. Kahoo, letsatsing leo ba tšoasa lihlapi tse ngata haholo. Ba ne ba lula ba rapela pele ba ea tšoasa litlhapi. Ka hona a le melato e lokelang ho lefshoa, 'me a tšoara e—e sehlopha se seholo sa lihlapi. 'Me a lula ka lephakong la sekepe, a hanela Simone ka sephaka sa hae, le ho re, "Simone!" Lebitso la hae e ne e le Jonase, le a tseba. 'Me o itse, "Simone, moshanyana oa ka, ke ne ke hopotse letsatsi le leng ke tla bona Messia. Ebile tšepo ea batho ba rōna haesale re tosa Egepeto, kapa ho tloha re tseba hoba Messia oa tšepiso o teng. Ho se ho fetile lilemo tse likete tse 'ne, mora. Banna ba

bangata ba baholo, baporofeta, ba hlokahetse, ba ntse ba Mo batla. Ke ne ke hopotse A tla fihla molokong oa ka. Empa joale ke se ke tsofala, mohlomong nke ke ka Mo bona. Empa, Simone, ke batla hore u hopole, uena le Andrease, hore mohlomong O tla fihla molokong oa lona, hoba ke se ke tsofetse joale 'me ke tla ea ho ba 'moho le baheso. 'Me ke lekile ho le holisa hantle lōna bashanyana, ke lekile ho le holisa ka Lentsoe. Joale mamelang. Joale, Simone le Andrease, pele Messia eo a hlaha ruri, ho tla hlaha lintho tse ngata tse etsahalang tlasa lebitso la 'Messia,' hobane seo e tla be le sera. Empa le se le bale, Simone, uena le Andrease le tiisetse Lentsoeng ka mehla. Le se ke la tlohela Lentsoe. Hopolang, Messia e tla ba moporofeta ea joaloka Moshe, hoba ke hantle feela. Ho sa tsotelehe, e ka ba senatlahali sa bolumeli, 'me a ka khona ho hlalosa mantsoe, a khone ho etsa ntho e kang eo; empa Bibeletse e boletse, 'E tla ba Moporofeta ea joaloka Moshe.' Amen. Joale ke kamoo le tla Mo tseba kateng."

<sup>98</sup> 'Me ka lona letsatsi leo eitseha Simone a nyoloha, le Andrease, ka pel'a Sefahleho sa Hae, le Jesu a eme mono, Andrease a mo bolella, a re, "Re fumane Messia."

<sup>99</sup> 'Me kea kholoa Petrose o hopotse tjena, kapa Simeone, mohlang oo, "Joale mohlomong u se u feteletse, Andrease. Ke tla ea le uena, 'me ke tla tseba."

<sup>100</sup> Ka hona eare ha a atamela pela Jesu, Jesu a re, "Lebitso la hao u Simone, 'me u mora Jonase."

<sup>101</sup> Hoo keha ho lekane. E ne e le eona. A Mo lumela 'me a Mo amohela, hoo a bileng a fuoa linotlolo tsa 'Muso ha morao. Ha a ka a kena sekolo kapa letho, o ne a nkile linotlolo tsa 'Muso. Hobane, ka tšenolo ea Molimo o tsebile hoba eo e ne e le Messia, hoba e ne e le Messia oa Lengolo. E ne e le moporofeta, 'me ba ne ba hlokile moporofeta lilemo tse makholo a mane, ho tloha ho Malakia. Ba ne ba fumane baporofeta ba bohata. Empa, moporofeta oa 'nete ea buileng 'Nete! 'Me mona ho ne ho eme Monna, Eo, hang hoba A mo bone, e seng feela ho mo tseba hoba e ne e le mang, empa a tseba hoba ke eèna eo ntata'e ea tsofetseng ea tšabang Molimo o mo rutile. Eaba ke phetho! "U Krete, Mora Molimo." Ua bona?

<sup>102</sup> "Lebitso la hau u Simone. U mora oa Jonase." Hoo ho ne ho lekane ho mo bontša. Joale ke seo Jesu a se entseng maobane, ho Ipaka, hore E ne e le Messia.

<sup>103</sup> E mong o na a eme mono. Re tla potlaka. E mong o ne a eme mono, ka lebitso la Filipi. Khele, seo sa mo hlasimolla! Ke eene eo re balang ka eèna mona. Sena sa mo hlasimollabisa haholo! Joale, Filipi a ka be a itse, "Hela, hoo ho qetile taba! Joale ke na le bonnete!"

<sup>104</sup> A pota leralla, limaele tse leshome le metso e mehlano. A e-ne le motsoalle a keneng sekolo le eèna, monna ea molemo, monna oa Lengolo, monna ea tšepahalang, monna ea neng tseba

Lengolo, 'me a rata Molimo. 'Me ke 'mona a kokota monyako, le—le ho re, “Nathanaele o kae?” [Moena Branham o kokotile sefaleng—Mohl.]

105 Mohatsa'e a re, “O kantle ka—ka jareteng. O ntse a rapela.”

106 A tloha ho mo batla, 'me o ne a le tlasa sefate. 'Me hoba a mo fumane, a re, “Tloo, u bone Eo re mo fumaneng; Jesu oa Nazaretha, mora oa Josefa.”

107 'Me joale nka nahana Filipi, kapa, Nathanaele a re, “Joale, Filipi, na ho ka tsoa ntho e molemo Nazaretha?”

A re, “Tloo u bone.”

108 Joale, ke polelo e ntle ho mang. U se ke oa lula hae oa nyatsa. U se ke oa ema oa tsoa. Lula u eme, 'me u fumane haeba ke 'Nete, kapa che. Ua bona? “Tloo, u iponele.”

109 Ho lokile, ho sepotela ka mothinya; ha re nahaneng moqoqo oa bona. Ke utloa Filipi a re ho—ho Nathanaele, “Nathanaele, Lengolo le re Messia e tla ba eng?”

“Oh, E tla ba—E tla ba Moporofeta ea joaloka Moshe.”

110 “Ruri. Ke hantle. Be, Jesu enoa oa Nazaretha eo ke u bolellang ka eèna, u sa hopola motšoasi oa lihlapa eo u rekileng hlapi ho eèna, 'me a sa khone kotsaana ea lebitso la hae?”

111 “E. Oh, ehlile, mora Jonase. Ke mo tseba hantle. Lebitso la hae ke Simone.”

112 “Hang ha a kena ka pela Sefahleho sa Monna enoa, A 'molella na ke mang, le ka ntata'e. Ho ke ke ha 'makatsa ha A ke ke a u bolella a u mang,” a rialo.

“Be,” a re, “joale, nakoana feela. Ke tla tlameha ho bona seo.”

113 Be, qetellong, ba fihla kopanong. Hang hoba a fihle ka pela Sefahleho sa Jesu, Jesu a re, “Bonang, Moiserale eo ho seng mano ho eèna.”

114 Joale e ka ba u itse, “Be, ehlile, O a tseba hoba ke Moiserale, kamoo a apereng kateng.” Batho bohle ba Bochabela ba apara ka ho tšoana, kaofela ha bona ba sootho, 'me ba litelu, le katiba ea turbane, le—le likobo, le joalo-joalo, ka ho tšoana feela. 'Me O tsebile joang hoba ke monna ea tšepelang le ea lokileng, ea se nang mano?

115 A re, A re ho eèna, “Bonang, Moiserale eo ho eèna ho seng mano.”

116 'Me ea makatsa monna eo oa Lengolo. A re, “Rabbi,” e bolelang *moruti*, “U ntsebella kae? Lena khetlo la rona la pele re kopana. U ntsebella kae?”

117 A re, “Le pele Filipi a u bitsa, u sa le tlasa sefate, Ke u bone.” Ke moo. Ke eona. “Ke u bone,” limaele tse leshome le metso e mehlang ho potoloha thaba, letsatsi pele ho moo. “Ke u bone ha u le tlas'a sefate.” Joale, le tseba seo a se entseng? A mathela

ho Èèna, a re, “Rabbi, U Mora Molimo! U Morena oa Iseraele!” Ke hora eo. Hobaneng? O khema le Mangolo, Eo moporofeta a ’moletseng a tla fihla. “U Mora oa Molimo! U Morena oa Iseraele!” Ha e etse phaphang seo ba bang ba se buileng.

<sup>118</sup> Joale, ba bang ba ne ba eme mono, oh, Bafarisi le Basadusi, le libishopo, le ofe e mong, morenana, baetapele ba baholo ba bolumeli, baprista ba baholo, le baprista, le ba bang bohle, ba eme mono, ’me ba shebile Seo. Ba itsebile ba tlameha ho ikarabella phuthehong ea bona. Ba tlameha ho ba fa po... ba tlameha ho araba potso ea bona. Ka hona le tseba seo ba se buileng? Ba itse, “Monna enoa ke Belsebule.” Ua bona? Ka mantsoe a mang, “Ke senohe, liabolosi.”

<sup>119</sup> ’Me Jesu a retolohela ho bona, le ho re, “Ke tla le tšoarella.” Le a bona, ba bitsitse Moea oa Molimo, o neng o etsa seo, moea o sa hloekang. Ho re, “Ke tla le tšoarella ka ho etsa seo. Empa ka letsatsi le leng Moea o Halalelang o tla tla etsa ntho e tšoanang, ’me lentsoe le le leng khahlano le ’Ona le ke ke la tšoarelola lefatšeng lena, le ha e le lefatšeng le tlang ho tla.” Lentsoe le le leng khahlano le ’Ona. Joale, hoo ho ne ho baletsoe mongoaha o mong. Ba shebeng.

<sup>120</sup> Joale, Bible e boletse “Lentsoe la Molimo,” Baheberu 4, “le bohale ho feta sabole e leolitsoeng ka nqa tse peli. Lentsoe, e leng Kreste, le bohale ho feta sabole e leolitsoeng ka nqa tse peli, le hlaba ho isa mokong oa lesapo, ’me ke Mosenoli oa mehopolo le merero ea pelo.” Lentsoe! Ha Lentsoe ka boLona le tsoelapele, ke seo Le leng sona. Ke eona phatlalatso, eo ke netefatso ea Lentsoe. ’Me ke ha Lentsoe le eme mono, le entsoe nama hara bona, le etsa hantle seo Le boletseng Le tla se etsa, ’me ha ba Le lemoha.

<sup>121</sup> Joale, hopolang, merabe ea batho e meraro feela lefatšeng, ke batho ba Kama, ba Sema, le ba Jafeta. Re tseba seo, haeba re lumela Bible. Bohle ba tsoa ho bana ba bararō, bana ba Nohe; Mojuda, Molichaba, le Mosamaria.

<sup>122</sup> Na le lemohile Petrose ea tšoereng linotlolo tsa ’Musu? Ba pele bao a ba buletseng, e ne e le Bajuda, ka Pentekosta. Na ho joalo? ’Me ha Filipi a theoha a rerela Basamaria, keha ba kolobelitsoe ka Lebitso la Morena Jesu, feela ba eso amohela Moea o Halalelang le joale; ’me ba romela Petrose ho theoha le ho ba beha matsoho, ’me ba amohela Moea o Halalelang. Na ho joalo? Liketso 10:49, “Eare Petrose a sa bolela Mantsoe ana, Moea o Halalelang oa theohela holim’a ba utloileng Lentsoe.” Le a bona? Joale lemohang batho ba bararō bao: Bajuda, Balichaba, le Basamaria.

<sup>123</sup> Joale mona Bajuda le Basamaria ba ne ba lebeletse Messia. Joale Jesu o ne a le leetong la Hae le eang Jeriko, ho tsoa Jerusalem ho ea Jeriko, empa o ne A lokela ho feta ka la Samaria.

124 Joale hopolang Santa Johanne 5:19, Jesu o boletse, hoba a haole letšeng la Bethesda, “Kannete, nete, Ke re ho lona, Mora o sitoa ho etsa letho a Inotši, haese seo A bonang Ntate a se etsa.” Na le e tšoare? Jesu o itse, “Mora o sitoa ho etsa letho a Inotši,” ke *Eëna* eo, “empa seo 'Na,” e seng ho *utloa* Ntate, empa, “ho bona Ntate a etsa.” Joale, Lengolo leo le nepahetse, kapa a mang oohle a fosahetse. A re, “Pele Ke etsa letho, Ke bona ka pono seo Ntate a Mpontšang ho se etsa, 'me Ke ee ho se etsa.” Ua bona? E ne e Mo teetse hare ka hohle. “Empa uena, ha ho ea ka tlang a sa huloe ke Ntate.” Ke 'nete.

125 Ka hona o ne A hloka ho pota ka Samaria, 'me A nyoloha a pota ka Samaria. 'Me e ka ba hora ea leshome le metso e 'meli. A roma barutuo a ba Hae, hoba A fihle motseng oa Sikare, A roma barutuo a ba Hae ho fumana liya-maleng, lijo. 'Me eare ba sa ile, ha tsoa mosali oa Sikare.

126 Joale, e ne e le mosali eo re 'mitsang “mosali ea mekhoha e mebe,” mohlomong e le moroetsana e motle ea nkileng tsela e fosahetseng, 'me a phela bophelo bo hlephileng. 'Me a tsoela ho kha metsi. Hobane, a ke ke a tsoa. . . Nkile ka fihla naheng eo, 'me meetlo ea bona e sa ntse e tšoana. Mosali oa mofuta oo ha a tsoakane le basali ba itlhomphang; ka baka leo a ke ke, a ke ke a tla selibeng seo ka nako e tšoanang le ea bao mono, kapa le letho. 'Me ka hona—ka hona o ea selibeng hoba ba bang ba khe metsi a bona, a tsoa ho kha metsi.

127 'Me hoba a etse, a ema, a ntse a lepeletsa thapo e toloking, e lihukoana tse peli, u thatela feela holim'a mofeng oa pitsa, *tjena*. Ha se nkho; ke mofuta oa pitsa, joalo, e entsoe ka letsopa, 'me ba e theolela selibeng, e be ba e nyolla hape. 'Me ka hona a qala a theola nkho, 'me a utloa Motho a re, “Mosali, Mphe metsi.” 'Me a sheba. E batla e le tšenola e kang ena, mono selibeng sa bohle sa motse, kantle ho Sikare. 'Me eaba o sheba koo, 'me mono ke ha ho lutse Mojuda oa lilemo tse bohareng. Joale, hantle-ntle A batla a le mashome a mararo le metso e 'meli.

128 Empa O sa tsoa qeta, ho Santa Johanne 6, moo ba 'Moleletseng hore O batla A le mashome a mahlano. Empa, ehlile, mosebetsi oa Hae o ne o bakile hoo, mohlomong. A re, “Ha U Monna oa lilemo tse fetang mashome a mahlano, le ho re U 'bone Abrahama”? Re a tseba U a hlanya joale.”

129 A re, “Pele ho Abrahama, KE TENG.” Ke hantle. Ba sa E utloisise, leha koana e moifo oa bolisa ba bohlale kahohle ka bokhoni ba bona. Empa bohlale ha se ho tseba Molimo; u tlameha ho lebala hoo hohle, ho tseba Molimo. Che.

130 'Me e ne e le bao. Joale mosali enoa a re. . . Hona, e le seo re se bitsang kajeno, “seotsoa,” 'me ke eo moo a neng a le teng. A re, “Monghali ha se tloaelo ho lona Bajuda ho nkopa, mosali oa Samaria, ho hong, hobane ha re amane.” Ka mantsoe a mang, “Khethollo e teng.”

131 A re, “Mosali, holane u tsebile Eo u buang le eèna, u ka be u kopile metsi ho 'Na. Nka be ke u file metsi ao u sa tlang ho a kha mona.” O ne a etsa'ng? A hokahana le moea oa hae.

132 Joale hopola, O ne a tlameha ho nyolohela Samaria. Ntate a sa tsoa re, “Nyolohela Samaria.” A sa etse letho pele Ntate a Mo bontša.

133 Joale O ne a le Samaria. Joale ha A tsebe hantle se tlang ho etsahala, empa mosali ke enoa, ka hona A hopola A tla qoqa le eèna. Ka hona A re, ho tloha a bua ka metsi. A bua ka ho rapela thabeng *ena* kapa thabeng *eane*, kapa joalo-joalo. Ka kotloloho a qhautsa bothata ba hae. Ba bakae ba tsebang hore e ne e le bofe? Ehlile, a le banna ba bahlano, ba tšeletseng ruri. Eaba o re . . . A re, “Ea, u late monna oa hao, le tle koano.”

A re, “Ha ke na monna.”

134 A re, “Ke 'nete. O boletse teng, hobane u bile le ba bahlano, le eo u phelang le eena joale ha se monna oa hau. Mono eo u buile 'nete.”

135 Lemohang! Joale ke tlameha ho tlapisa taba ena, hobane ke tlameha ke—ke tlameha ho khaotsa. Shebang phapang lipakeng tsa mosali eo, maemo ao a neng a le ho ona, le bareri bao ba rutehileng haholo.

Mosali eo o itse, “Monghali, ke a lemoha hobane U Moporofeta.”

136 Baprista le barutehi ba itse, “U Belsebule, liabolosi, senohe.”

137 Mosali enoa o itse, “Monghali, ke a lemoha hobane U Moporofeta. Rea tseba mohla Messia a tlang, O tla re bolella lintho tsena.”

138 Haeba e ne e le pontšo ea Messia maobane eo, 'me esale Eèna maobane, kajeno, le kamehla, e tlameha ho tšoana!

139 A re, “Rea tseba Messia, ea bitsoang Kreste, Motlotsuo; mohla A tlang, O tla re bolella lintho tsena. Empa Uena u Mang?”

140 A re, “Ke 'Na ea buang le uena.” Eaba ho lekane. O e bone!

141 Shebang phapang. Sheba ha Leseli leo le chabela holima peo eo ea bolisa le tumeloana, le mekhatloana, ha ea sebeta ho hang. Empa khetlo la pele ha Leseli leo le chabela peonyana eo e reriloeng pele mono, La halima ka potlako, a Le elelloa. A re, “Monghali, U tšoanetse u be u le Moporofeta! Re a tseba Messia o a tla, 'me O tla etsa lintho tseo.”

A re, “Ke Eèna.”

142 'Me a tloha, a kena motseng, a re, “Tloong, le bone Monna ea mpoleletseng tseo ke li entseng. Na ha se eèna Messia?” Amen.

143 Ke moo! E ne e le eng maobane? Ke seo A leng sona kajeno, o tla ba joalo kamehla. Na lea bona? O ne a le joalo.

144 Davida o ne a tlotsitsoe ke Moea oa Molimo. Baporofeta ba ne ba tlotsitsoe ke Moea oa Molimo.

145 E ne e le Kreste ka ho Josefa, e leng se entseng hore a take Kreste, hantle. O rekisitsoe ka likotoana tse mashome a mararo tsa silivera, a ratoa ke ntata'e, a hloiloe ke baena, ka tlung ena ea chankana. Joalo ka Kreste sefapanong, e mong o ne a pholosoe; le moapehi le moqhatsetsi oa ntlo, 'me e mong a pholoha 'me e mong a lahleha, ke ntho e tsoanang. Ho lula letsohong le letona la Faro; 'me nako le nako ha a tsoa, ho ne ho letsoa terompeta, "E mong le e mong a khumame ka lengole. Josefa o a tla." Ho se motho ea ka fihlang ho Faro, haese ka Josefa. Eo e ne e le Kreste kaho Josefa!

146 E ne e le Kreste ka ho Davida, joaloka morena ea lahluoeng, 'me a hloa Thaba ea Mehloaare, mohla a theotsoeng teroneng ke batho ba habo, e le morena ea lahluoeng, a nyolohela hlorong ea leralla a llela Jerusalema, 'me a lla, hoba e ne e le morena ea lahluoeng. 'Ona Moea o ka ho Kreste, o ile oa llela Jerusalema, le ho re, "Jerusalema, Jerusalema, Ke ratile ha kae ho u bokanyetsa joaloka ha khoho e etsa."

147 E ne e le Kreste ka ho batho bao, ba tlotsitsoeng, ho nyoloha, ho fihlela Motlotsuoa enoa ea phethahetseng a fihla. Sehlabelo sa sebe se ne se eso hlahisoe. A ke ke a kena ka nama eohle joalo, hobane e le feela tlas'a . . . Ba ne ba tlotsitsoe. Empa joale Moea o Halalelang o tlile, e leng Kreste ka sebopelo sa Moea. Joale lemohang.

148 Joale, hobaneng A sa etsetsa Balichaba lipontšo tseo? Ha e a etsoa ke Eèna. Hobaneng? Balichaba ba ne ba sa lebella Messia. E ne e le bahetene, re ne re le joalo, batho ba rona, Baroma le ba joalo, morao mono ba jere molamu mokokotlong, ba rapela lisèto. Ba ne ba sa lebella Messia. 'Me Messia o tla feela ho ba Mo batlang. Ke eona feela tsela. "Ho ba Mo batlang, O tla hlaha khetlo labobeli." Ke ba Mo batlang feela! Eseng feela ba—ba amanang; empa ba Mo batlang kannete. 'Me lemohang, ha A tle ho Molichaba. Mohlolo oo ha o eso etsoe ka pel'a Molichaba.

149 'Me Molimo o sa fetoheng! Joale re fetile lilemo tse likete tse peli tsa thupello le lintho tsa mefuta eohle, 'me joale ho fihlile nako ea mantsiboea, 'me joale Balichaba ba shebeletse Messia ea tlang. Joale, haeba e le Eèna eo! O iponahalitse ka ho tsoana mohlang oo, ho meloko e 'meli eo, O tlameha ho iponahatsa ka ho tsoana le mono. Mme ho tšepisitsoe! Lengolo le le leng hape, ebe ke a koala.

150 Hopola ka mehla, boloka mefuta e meraro ea batho kelellong ea hau. Ba lula ba le teng, e leng: balumeli, baikaketsi, le bomosalumele. Ba teng sehlopheng se seng le se seng. Le a bona?

151 'Me Abrahamama o ne a fuoe tšepiso, le peo ea Abrahamama e mo latetseng. Joale lemohang peō ea Abrahamama, ka sebopelo sa Lota, e ile ea thehela Sodoma, menate ea lefatše; eo ke kereke

ea tlhaho, mokhatlo oa phutheho, ea mokhatlo. Empa Kereke ea moea, e neng e le Abrahama eo Molimo a mo etetseng ka sebele, ba bitsitsoeng, ha a ka a kena Sodoma, a le kantle ho Sodoma; eo ke Kereke, e bitsitsoeng. Joale, nako ea ho qetela e fihlile, mohla A tla timetsa linaha ka mollo.

<sup>152</sup> Ke sona seo A itokisetsang ho se etsa hape. Na ho joalo? Joale shebang. Jesu o itse, “Joaloka matsatsing a Sodoma, ho tla ba joalo ho tlang ha Mora motho.” Hopolang, bao e ne e le lichaba tsa Balichaba. Le a bona? Qetello, joaloka ha ho etsahetse Sodoma. Joale Balichaba ke bana ba nyoloha. Nako ea Bajuda e felisitsoe ka metsi. Lekhetlong lena, Balichaba ba timetsoa ka—ka mollo. Lemohang, “joalo ka Sodoma,” ha re shebang feela.

<sup>153</sup> Abrahama e ne e le eo, Kereke e khethiloeng, e bitsitsoe Sodoma; ea moea, Molimo o hlaha lihahelong tsa bona ka linako tsohle, lipontšo le meeka, ka tšepiso. Ho lula mona maralleng, linaheng tse boketa, ba sa ruoa joaloka ba bang; empa ba futsanehile, ba lutse mona; sehlotšoana, se nyatsuoang, se songoang. Ba bang ba tlohile ba ipatlela leruo le ho beoa babusi ba motse, joaloka ha bana ba Kaine ba entse kamehla, banna ba baholo, boramahlale, lingaka, le lintho tse joalo. E ne e le bao, hantle feela joaloka ha esale ho le joalo. Molimo ha o fetohle. 'Me e ne e le bao ba lutse mono.

<sup>154</sup> Joale, tlase Sodoma ho le kereke e fofa, Lota le sehlopha sa hae. Abrahama le sehlopha sa hae e ne e le Kereke e khethiloeng. Lemohang. E ntano ba Basodoma, bomosalumele.

<sup>155</sup> 'Me ha fihla Baromuoa ba bararo ba tsoang Leholimong, ba apere joaloka batho. 'Me Abrahama a lula monyako oa tente ea hae hoseng ho hong, 'me a sheba, 'me ha nyoloha Banna ba bararo. Joale, liaparo tsa bona li tletse lerole, eka esale ba tsamaea. 'Me ho Abrahama, ho le Nthoana ka hare ho eena, a tseba hoba bao e ne e le banna ba makatsang. Eka batho bao a lokelang ho ba tseba, kahoo a matha a etsoa.

<sup>156</sup> Ntho e teng e ikhethang ka Mokreste oa 'nete ea tsoetsoeng bocha, ha u kopana le e mong oa bona! Kajeno ha ke feta reshurenteng, motho o itse, “Molimo a u hlohonolofatse.” Ka retoloha. Ka re, “Uh-oh, ho na le phoso.” Mosali e monyenyanane a ntsukutla letsoho. Joale, ntho e teng ka Mokreste ea tsoetsoeng labobeli!

<sup>157</sup> 'Me Mangeloi ana a nyolohela mono 'me a qala a buisana le Abrahama. Joale hopolang, bobeli ba bona ba ile ba thehela Sodoma, ho bitsa, ho bona haeba ba ke ke ba fumana batho ba leshome feela. Na ho joalo? Ba babeli ba tsamaile. E mong oa bona a sala morao 'me a buisana le Abrahama. Na ho joalo? Joale hlokomelang.

<sup>158</sup> Tlase mono, ho ne ho se mehlolo, haese ho ba fufatsa feela mohla ba batlileng ho kena. 'Me thero ea Evangeli e otlala

mosalumele ka bofofu. Ke seo Bibe le se boelang. 'Me le hopole, Billy Graham oa sejoale le e—le borabohlale tlase mono ba ntse ba rera, “Tsoang! Tsoang! Tsoang!” Ua bona?

<sup>159</sup> Empa hopolang, Ea setseng le Abrahama, o entse ntho e 'ngoe 'moho le Kereke e khethiloeng, O ne a lutse a furaletse tente ka mokokotlo oa Hae. Joale hopolang, e ne e le “Abram” letsatsi kapa a mabeli pele ho moo, 'me Sarah e ne e le “S-a-r-r-a.” Empa joale ke *S-a-r-a-h*, 'me ke *A-b-r-a-h-a-m*; “ntata lichaba,” le “khosatsana.” Le a bona? Joale Moeti enoa o tsebile joang, mohla A neng a lula fatše, A furaletse tente? 'Me A re, “Abrahama, mosali oa hau o kae, Sarah?” O tsebile joang hore o nyetse? O tsebile joang hore lebitso la hae ke Sarah?

'Me Abrahama a re, “O ka tenteng ka mora Hao.”

<sup>160</sup> Joale shebang. “Na,” leemeli la motho, “Ke tla u etela.” O ne a entse'ng? A lula mono a ja namane e hlajuoeng ke Abrahama, a ja bohobe bo besitsoeng ke Sarah, le ho noa lebese la khomo.

<sup>161</sup> Motho o ile mpotsa nakoana e fetileng, ho re, “E ne e le mang, Moena Branham?”

Ka re, “E ne e le Molimo.”

<sup>162</sup> Abrahama o tlamehile a be a tsebile, o buile le Eèna. Botsa moreri ofe kapa ofe. A Mo bitsa, “Elohim,” e—e Ea leng teng ka Boèna; hlaku e kholo M-o-r-e-n-a, “Morena,” Ea leng teng ka Boèna.

<sup>163</sup> Joale sheba, u ke ke ua e fosa. “Abrahama, mosali oa hao Sarah, o kae?”

Ho re, “O ka tenteng, ka mora Hao.”

<sup>164</sup> A re, “Ke tla u etela ho ea ka nako ea bophelo.” Seo A mo tšepisitseng sona lilemo tse masho-peli hlano pele ho moo! Abrahama a le lekholo, 'me Sarah a le mashome a robong. “Ke tla u etela ho ea ka bophelo.”

<sup>165</sup> Joale hopolang, Sarah, mosalimoholo, o ne a lesitse ho phela le eèna joaloka mosali. Ha ho mosali oa lilemo tse mashome a robong... Mohlomong lilemo tse mashome a mabeli kapa tse mashome a mararo, mohlomong, ho tloha e le mosali oa Abrahama. Ba ne ba tsofetse. 'Me a itšehela ka hare; le a tseba, seo re se bitsang, “a tšeha ka hare.” Ho re, “'Na, mosalimoholo ea kang 'na; le morena oa ka, Abrahama, ka ntle mono, o tsofetse, le eèna; 'me ke tla boela ke thaba joaloka monyaluoa, le Abrahama?” 'Me a tšeha taba eo.

<sup>166</sup> 'Me Lengeloi, le furalletse tente ka mokokotlo oa Lona, la re, “Hobaneng ha Sarah a tšeha, ka ho re, ‘Lintho tsena li ke ke tsa eba joalo?’” E ne e le ho bala mohopolo ha mofuta ofe hoo?

<sup>167</sup> Jesu o itse, “Joaloka matsatsing a Lota, ho tla ba joalo ho tleng ha Mora motho.” Mono, kereke ea maipolelo feela e fumane baromuoa ba eona. 'Me Moromuoa oa Moea o Halalelang o 'moho

le Kereke e khethiloeng, o etsa ntho e tšoanang, hoo ho Mo etsa, Krete eèna maobane, kajeno, le kamehla. Moromuoa oa hora ena ke mang? Ha ho motho! Moea o Halalelang ke Moromuoa oa hora ena. Ke eng? Molimo, o ahileng nameng ea motho. Khanya! Ke ikutloa ke halalela. Amen. Molimo, nameng ea motho, o ahile hara lona!

<sup>168</sup> Jesu o itse, “Bonang, ho se ho se hokae ’me lefatše ha le sa tla Mpona.” Eo ke mosalumele. “Empa lona le tla Mpona,” Kereke, “hoba ’Na,” leemeli la motho hape, “Ke tla ba le lona, le ka ho lona, ho isa bofelong ba mongoaha, pheletsong ea lefatše.” Jesu Krete eèna maobane, kajeno, le kamehla! Molimo oa rōna ha o a shoa! O phela kamehla eohle! O phela nakong ea qetelo, mohla letsatsi le likelang.

<sup>169</sup> Letsatsi le chaba Bochabela le likela Bophirima. Tsoelopele e haotse le letsatsi. Re tseba seo. Tsoelopele ea rōna ea khale ka ho fetisisa ke Chaena. ’Me mohla Mora (M-o-r-a) a ne a chaba khetlo la Hae la pele, e ne e le holima batho ba Bochabela. Joale tsoelopele e haotse ho fihlela re . . . Hantle koana ke Lebopo la Bophirimela! Ha re ka tsoelapele, re tla boela Bochabela hape. Khefutso e latelang ke Japane, China. Re tla boela Bochabela, ha re ka tsoelapele. Tsoelopele e tsamaile le—le letsatsi.

<sup>170</sup> Joale moporofeta o itse, “E tla ba letsatsi le ke keng la bitsoa motšehare kapa bosiu, le lerootho, letsatsi le moholi.” Batho ba tsebile ho lekaneng ka Molimo ho ingolisa kerekeng, ba ngole mabitso a bona bukeng, ’me ba tsamaile ka Leseli leo ba le fumaneng. Letsatsing le moholi, khanya e lekane letsatsing, ho seng u ne tla sitoa ho tsamaea. Empa o itse, “Ka nako ea mantsiboea, Leseli le tla chaba.” Ke eng? Lona letsatsi le chabang Bochabela, le likela Bophirimela. ’Me eèna Mora oa Molimo ea bonahalitsoeng le ea hlahlileng Bochabela, o hlaha Bophirima joale nakong ea mantsiboea, Leseli la mantsiboea ho Kereke e bitsitsoeng le e tlatsitsoeng ka Moea o Halalelang.

<sup>171</sup> Krete, ka Mali le ka Matla a methapo ea Hae ka Sebele, o hloekisitse batho ba sa hloekang, le ho aha hara bona ka sebopelo sa Moea o Halalelang. Amen. Setšoantšo sa Eona, ba bakae ba kileng ba bona setšoantšo seo? Se teng hona joale ka morao mane. U ka ea ho Se sheba. George J. Lacy, hlooho ea FBI lefapheng la menoana, se katlalitsoe. ’Me lona Lengeloi leo le eteletseng Iseraele pele, le teng joale le ho etsa ntho e tšoanang le eo Le e entseng mohla Le emeng kahara Botho ba Jesu Krete. Krete, ’mele, o nyolohetse letsohong le letona la Ntate; empa Moea o Halalelang o a khutla, Bophelo bo neng bo ahile ka ho Krete, bo ahile kahar’a Kereke. Joale Krete ha a . . . Be, haeba . . .

<sup>172</sup> Mohla Jesu a ne a bua, ho Johanne 15, “Ke ’na sefate sa Morara, lona le makala.” Joale, Morara ha o behe tholoana; ke lekala. Le tseba seo, lona batho mona, balemi ba merara, le ba

joalo. Joale, haeba lekala leo la pele le tsoileng ho Morara, le hlahisitse Buka ea Liketso e le salang morao, Kereke eo ea pele; haeba Morara oo o ka hlahisa lekala le leng, lekala le leng, le tla ngola Buka e 'ngoe ea Liketso e le salang morao. Hoba, bona Bophelo bo ka hara Morara bo hlaha kahara lekala. Ehlile. Re fumana makala a mangata a khomathisitsoeng ka mona.

173 Ke bone sefate tsatsi le leng Phoenix, Arizona, se behile litholoana tse robong tse fapaneng ho sona, litholoana tsa sitrase. 'Me ka re ho motho e mong, ka re, "Moena Sharrit." Ka re, "Moena Sharrit, hoo, ke eng hoo? Lemone, thanjerine, thanjelo, le—the tholoanamorara, le ntho eohle." Ka re, "Joale mohla seo, mohla tseo tsohle li khotsoeng," ka re, "selemong se tlang joale se tla beha, se tla beha lilamunu, hoba ke sefate sa lamunu."

174 Ho re, "Oh, che. Se tla beha tholoanamorara, lemone, le sohle seo lekala le leng sona."

175 "Khele," ka re, "ho a makatsa. U re u khopamitse sefate seo sa lamunu lifateng tsa mofuta oo?"

176 A re, "Che. Sefate sa lamunu se sa ntse se tšoana. Ha se ka hlahisa lekala le leng, le tla beha lamunu. Empa se hlomathisetsoang ho sona joalo, se tla beha sa mofuta oa sona, hobane ke tholoana ea sitrase."

Ka re, "Ke moo he!"

177 Bolumeli ba mokhatlo bo khona feela ho hlahisa tholoana ea bolumeli. Empa ha Morara oo oa mantlha o hlahisa o mong, e tla ba Jesu Krete eèna maobane, kajeno, le kamehla! "Ke tla khutlisetsa," ho bolela Morena. Amen. (Ke nako ea ho khutlela hae.)

178 Eng? "Benghali, re rata ho bona Jesu." Le ne le tla batlana le Motho oa mofuta mong? Motho ea tšoanang le ea neng a le teng. Joale, ha u theohele seterateng mona 'me u batla e—e monna ea apereng kobo ea mofuta o itseng, le maqeba a lipekere hloohong ea hae, kapa seo e ka bang sona. Moikaketsi ofe a ka etsa hoo. 'Me ke hantle. Mang le mang a ka etsisa seo. Empa e tla ba Bophelo bo neng bo le ho Krete, bo tla ba ka Kerekeng ea Hae. Ke Bophelo boo!

179 Ha u ka ntša bophelo ho e—e mokopu, 'me u bo kenya ho morarara, bo ne bo tla beha mekopu, haeba bo ne bo ka phela joalo. Ehlile, bophelo bo ka hare ho oona.

180 'Me ke hona moo Bophelo bo leng teng joale. Bophelo ba Krete ka har'a Kereke, bo boela bo hlahisa Krete hape. Ke kamoo ba bonang Krete. Eona. . . Ho Johanne 14:12, o itse, "Ea lumelang ho 'Na, e seng moipehi-tumelo; empa ea lumelang ho 'Na, mesebetsi eo Ke e etsang o tla e etsa le eèna. O tla etsa le e mengata ho ena, hoba Ke ea ho Ntate oa Ka." Jesu Krete eèna maobane, kajeno, le kamehla.

<sup>181</sup> Bakreste. Ke bile moromuoa, ke bone melimo e fapaneng e makholo, e, likete tsa eona, mefuta eohle, maSikhs, maJains, Buddha, mefuta eohle e kōpantsoeng, le a bona. Ke ile ka amoheloa nakoana e fetileng, India, teng ke tšoere letšoele la ka le leholo ka ho fetisisa, likete tse makholo a mahlano kopanong e le 'ngoe. 'Me mono ka phomosetsoa ka tempeleng ea maJains. 'Me ka mono ho le litumelo tse fapaneng tse leshome-supu, melimo e fapaneng e leshome-supu, 'me tsohle tseo khahlano le Bokreste. Empa, oh, khili, ekare le ka be le 'Mone ha a hlaha temeng. E mong le e mong oa bathehi ba o hlokahetse 'me ha a eo. Oa rona o tsohile hape, 'me O phela ka mehla le mehla, ho phela ka Kerekeng ea Hae, eèna maobane, kajeno, le kamehla.

Ha re inamiseng lihlooho tsa rōna.

<sup>182</sup> Morena Jesu, re thabetse ho bua ka Uena. U rateha haholo 'me u lokeloa ke sohle seo re ka se buang. Empa, Ntate, Lentsoe le le leng feela le tsoang ho Uena le ka etsa ho feta sohle seo nka se buang, kapa moreri ofe. Lentsoe le le leng feela le tsoang ho Uena le ne le tla e rarolla. Na U ke ke oa e etsa bosiuang bona, Ntate, re sa emetse joale, nakoana feela, Uena, ke a rapela. Re tla, re ke ke ra U emela nakoana, Morena, re tla emela ho fihlela U itokisitse. Re batla ho utloa ho tsoa ho Uena. Ke a rapela, Ntate ea Maholimong, bosiuang bona, ke sa tšoareletse letšoele hape, halelele. Empa ba rateha haholo, Morena. 'Me kea tseba hoba letsatsi la mantsiboea le liketse. Re phela meriting joale. 'Me, Molimo, ho ka ba le motho ea sa U tsebeng. Ke rapela hore U tle ho rona bosiuang bona, Morena, ka sebopeho sa Moea o Halalelang, le ho etsa hore batho ba U bone, ho bona eèna Jesu eo ba 'moneng matsatsing a fetileng.

<sup>183</sup> E ne e se monna, 'mele (ba o thakhisitse sefapanong, empa Molimo o o tsositse), empa e ne e le Bophelo boo bo neng bo le ka ho Eèna. Ha A re, "Tloong, le bone kamoo Ke aparang liaparo tsa Ka, ke pontšo ea hore Ke Messia. Tloong, le bone likolo tseo Ke tsoang ho tsona, tumeloana eo Ke e rutang." Che, e ne e se seo, kamoo A Itsebisitseng kateng. Empa O itse, "Ekare ha Ke sa etse mesebetsi ea Ntate oa Ka, le se ke la lumela ho 'Na. Empa le ha Ke etsa mesebetsi ea Ntate oa Ka 'me le sa lumele ho 'Na, lumelang mesebetsi, ke eona e Mpakang. Ke eona e Ntsebisang." 'Me ba bone hore U ne u le Messia, hoba U ne u le Moporofeta, Molimo-Moporofeta.

<sup>184</sup> 'Me joale bosiuang bona, Ntate, re rapela hore U re hlohonolofatse bosiuang bona joalokaha U entse ho Kleopa le motsoalle oa hae. Kamora moo ba tsamaile le Uena lilemo tse tharo le halofo, 'me ba bone lintho tseo U li entseng; eaba U a thakhisoa, tlasa Ponse Pilato—Pilato, O ile oa sotleha, oa thakhisoa, oa shoa. 'Me ka letsatsi la borarō, ba ne ba le tseleng ea bona e eang Emmause. Ba ne ba utloile menyeneyetsi ka basali le barutuoa ba bang, hore "O tsohile." Empa tsatsing leo O ile oa

tsamaea le bona 'me oa bua le bona mohlomong letsatsi lohle. Ba ne ba sa U tsebe.

<sup>185</sup> Ekaba ba bangata mona ba entse joalo. U tsamaile le bona oa bua le bona, empa ha baa ka ba E lemoha.

<sup>186</sup> Empa mantsiboea, ba U memela kahare, eaba U koala menyako 'me ua lula fatše. Eaba U etsa ntho hantle kamoo U e entseng pele ho thakhiso ea Hau. Ba tseba nakong eo hore e ne e le Uena. Ka motsotsoana, Oa nyamela mahlong a bona, oa tsoelapele ho kena kante bosiuung. Ba ea bathong ba habo, ba re, "Morena o tsohile!"

<sup>187</sup> Molimo, na U tla e etsa hape bosiuung bona? Etsa ho hong har'a rona bosiuung bona, Morena, joaloka ha U e entse pele ho thakhiso ea Hau. Joale re tla ba le tšepo 'me re tsebe hobane Kreste oa rona ha a shoa, empa O tsohile bafung, 'me o phela hara rona, ka ho sa feleng. Re inehela ho Uena, Ntate. Ke nehela kereke ena ho Uena, le moea o mong le o mong ka mona, ho Uena, U tle u re sebelise ho tlotlisa Kreste. Ka Lebitso la Jesu ke a e kopa. Amen.

<sup>188</sup> Joale pele re rapela kapa ho memela mola oa thapelo, ke tla le kopa ho hong. Ke batla motho e mong le e mong, ka kopo, a lule setulong sa hae metsotso e 'maloa feela. Joale le lokela ho ba le tlhomphe nakong ena. Joale, ha u sa lumela, tsoela kante feela ha bonolo. Empa joale, haeba le tlo lumela, lulang le khutsitse, feela mets- . . . metsotso e ka bang leshome-hlano, le a bona. Ha re boneng haeba A tla bua le rōna. Joale rōna, ha re ka hara e . . . Re ka hara arena, empa ena ke kereke. E nehetsoe morero oo, ka hona ha re luleng re khutsitse. E mong le e mong oa lona ke moea. Haeba u se joalo, u shoele. Le a bona? Ka hona u moea, 'me ha Moea o Halalelang o theoha ho tlotlisa hara batho, O a hokahana, o lemoha meea ea bona, oa bona. 'Me ha le phethesela, phetoho e teng.

<sup>189</sup> U re, "Oh, Moena Branham!" Be, hobaneng A isitse monna oa sefoku kante ho motse? 'Me, ka hona, le a bona? Lea bona?

Joale ba bakae ba Mo lumelang? "Benghali, re ka rata ho 'Mona."

<sup>190</sup> Joale re tla bitsa molanyana oa thapelo. Kea kholoa ba bitsa . . . Ke hokae . . . Kapa na o ntšitse, yaa, litlankana tsa thapelo 'ngoe ho fihla ho lekholo? 'Ngoe ho fihla ho lekholo, eng? C, C. Ho lokile, ha re bitseng, litlankana tsa thapelo. C, palo ea 'ngoe, ke mang ea tšoereng setlankana seo? C, palo ea 'ngoe. Sheba setlankana sa hao sa thapelo, uena ea tšoereng setlankana sa hao sa thapelo. Palo ea 'ngoe. Ho lokile. U tla ba tlisa nqa efe, ka nqa ena, morao ka nqa ena? Ho lokile.

<sup>191</sup> C, palo ea 'ngoe. Palo ea peli. Ho lokile, mofumahali. Palo ea tharo. Palo ea tharo. Ha u khona ho ema, kapa ho phahamisa letsoho la hau kapa ho hong, ke tle ke . . . Palo ea tharo, ke mang ea tšoereng setlankana sa thapelo? Monghali, ho lokile. Palo ea

'ne, karete ea thapelo ea palo ea 'ne. Ho lokile. Ho lokile, palo ea 'ne. Ke mang ea tšoereng palo ea 'ne, na u ka phahamisa letsoho la hao, ka kopo? Ho lokile, mofumahali, tloo koano. Ua bona, ba mpa feela. . .

<sup>192</sup> Ba theoha, moshanyana o etsa joalo, 'me o nka litlankana tsena tsa thapelo 'me o ema ka pel'a lona. O a li tsoaka, e be o qala a le abela setlankana sa thapelo. U ka fumana tšelela, 'me e mong a fumane leshome le metso e mene.

<sup>193</sup> Tloo koano, mofumahali. 'Ne, hlano. 'Me ke mang ea tšoereng hlano, phahamisa letsoho la hao. Setlankana sa thapelo sa palo ea hlano. 'Me hape ntho e 'ngoe ha a. . . Hantle tlase mona, mofumahali, sena. 'Me ntho e 'ngoe eo ba e etsang tabeng eo, ka linako tse ling ke bitsa ho tsoa nqa e 'ngoe. . . Ba bakae ba kileng ba etela kopano pele, e 'ngoe ea likopano tsa rona? Oh, hantle, ke hopotse ke le hara batho basele. Che, ho hang. Ho lokile. Hlano, tšelela. Ke mang ea tšoereng tšelela? Ho lokile. Supa, robeli, robeli, robong. Ke utloisisa sena, hoba batho ba sa utloeng, le batho ba lutse litulong tsa bakuli 'me ha ba khone ho tsamaea. Robong, leshome, palo ea leshome. Leshome, re reng ka Sepanische? Leshome. Ho lokile, leshome-nngoe, karete ea thapelo ea leshome-nngoe. Ho nahana motho e mong seotloaneng. . . Mona. Ho lokile, leshome-peli. Ho lokile, leshome-peli. Leshome-tharo. Setlankana sa thapelo sa leshome-tharo, na u se tšoere, mofumahali? Leshome-nne, leshome-nne, leshome-hlano. Ha re, be, hoo, ha re qaleng joalo joale. Ho lokile.

<sup>194</sup> Joale, ka kopo hleng, joale le be le tlhompho feela. Joale ba bakae mona ba se nang karete ea thapelo, empa koana le lumela hore Jesu Krete o tla le folisa? Phahamisa letsoho la hao. Ha ke tsotelle moo u leng teng. Ba bakae ba kileng ba tla likopanong, 'me ba tseba hoba ba bangata ba folisitsoe kantle mono ho feta ba holimo mona, ka ho ba bitsa feela? Ehlile, ba se na likarete tsa thapelo! Ebang le tumelo feela joale, le se belaele, lumelang ka pelo ea lona eohle.

<sup>195</sup> Setlankana sa thapelo sa hlano ha se eo. Liashara li bitsa setlankana sa thapelo sa palo ea hlano. Le a bona, haeba u ema 'me. . . U se ke ua nka setlankana sa thapelo haese ha u tla se sebelisa; le a bona, u se ke. Le fumana nomoro tsa lona joale, hobane re tlilo rapella e mong le e mong ea fumaneng likarete, bona, 'me ha re—re batle ha le fosa nako ea lona. Ehlile, joale, ha re bitsa hape joale, re khaolitse ka leshome-hlano, mohlomong ke hona moo re tla qala teng hosane bosiu, sebakeng se tšoanang, le a bona. Re tla li fihlela, kaofela, ka hona u tla—u tla fetoa ke nako ea hau. Ua bona? Yaa. Setlankana sa thapelo sa palo ea hlano. Ke hantle.

<sup>196</sup> 'Me u be le tumelo feela. Se belaele. 'Me u lumele ka pelō ea hau eohle. Joale, joale e mong le e mong oa lona ea tšoereng

setlankana sa thapelo, kapa a se na setlankana sa thapelo, 'me u lumela, joale ha ba ntse ba lokisa mola, talimang ka lehlakoreng lena.

<sup>197</sup> Khetlo le leng mosali, mohlomong a se na karete ea thapelo, empa a e-na le se hlokoang, tumelo. 'Me a pholletsa letšoole, a re, "Ha nka ama seaparo sa Hae feela, ke tla fola." Ba bakae ba utloileng pale eo? Mosali oa phallo ea mali. Joale mosajana eo o ne a ikemiselitse hore o tla ama Jesu. A re, "Ke a Mo lumela. Ha ke tsotelle baprista ba bakae le ba bang bohle ba sa lumeleng ho Eèna, ke a Mo lumela. 'Me ke a lumela ha nka ama seaparo sa Hae, ke tla fola. Kea lumela Ke Messia."

<sup>198</sup> Na le a lumela Ke Messia? Ehlile. Joale na le ka Mo ama? Joale, ho bareri, baena ba bareri ba kae? Ho lokile, moreri, joale e. . . Na Bibehe e a bolela, baena ba bareri, kapa lōna bohle babali ba Bibehe, ho re "Eèna hona joale," Buka ea Baheberu, khaolo ea 3, "ke Moprista e Moholo ea ka angoang ke maikutlo a mahlomola a rōna"? Ke ba bakae ba tsebang Bibehe e rialo? Ehlile. Be, ka hona, haeba E le Moprista e Moholo, 'me Moprista e Moholo eena eo, na A ke ke a itšoara ka ho tšoana? Ua bona? Haeba E le oa maobane, kajeno, le kamehla, (ke sehlooho sa rōna seo), O tla itšoara ka ho tšoana. Joale u re. . .

<sup>199</sup> Joale haeba u nyolohela mona 'me u nkama, ha e etse phapang ea letho. Ho ama balisa, ho ke ke ha etsa phapang ea letho. Ho ama molisa oa hao mono, ho sa tsotellehe hore na ke mang, ho ne ho ke ke ha etsa phapang le hanyenyane. Empa, u ama Eèna!

<sup>200</sup> Joale u ka tseba joang hore u Mo amile? O ne a tla boela a sebetsa a etsa ntho eona eo. Le a bona? Mo ame u bone haeba A sa bue hantle ka mona, le ho re, "Tumelo ea hao; u ne u e-na le *hore-le-hore*," le eng eo e leng eona, le ho u bolella hore na e ne e le eng, le se etsahetseng, le tsohle ka eona. Joale, ke ba bakae ba boneng seo se etsahala makhetlo a makholo, phahamisa letsoho la hau. Lea bona? Ehlile, ha eso hlolehe, ha eso hlolehe. Hobaneng? A ke ke a hloleha; Ke Molimo. Le a bona? Na ha u a thabela ho ba Mokreste, oa sebele, Mokreste ea tsoetsoeng labobeli, ruri ka tlhoho ea Krete?

<sup>201</sup> Joale, lōna ba kantle mono letšoeleng joale, le be le tlhomphe ea 'nete, le re, "Ke tla e lumela, ho sa tsotelehe seo mang a se etsang, seo mang a se buang, ke tla e lumela ka pelō ea ka eohle." 'Me u tšepahale 'me u lumele joale. Ho lokile. Ho lokile.

<sup>202</sup> Mono, baena morao mane, le bareri le bao, ba tlisa bakuli.

<sup>203</sup> Joale ke nahana, e, *ona* a a phela. Joale haeba ea. . . moenjiniere ea ho ono o tla leka ho o phahamisa hanyenyane.

<sup>204</sup> Hobane, ka linako tse ling ha tlolo e otlala, ha ke—ke tsebe seo ke se buang. U a bona, ke tla tlameha ho. . . Ke sebakeng se seng morao bophelong; lea bona. 'Me etlare ha ke. . . Feela joaloka ha u lorile, lea bona. 'Me u lora joalo ka toro, haeba ke e taka joalo

ho uena, empa u eme hantle mona; ho khutlela morao lilemo maphelong a batho, le ho fumana seo ba se entseng, bothata ke bofe, le eng hape, le ho e hlahisa joalo, le a bona. 'Me oo ke Moea o Halalelang. E be O bolela se neng se le teng, se leng teng, se tlang ho tla, joalo-joalo. U mpa u e shebella u mamelisa hantle, e be u nka liteipi tsa hao, 'me E tla u bolella.

<sup>205</sup> Joale ke monna ea batlang a le moholoanyane ho mpheta. 'Me ke lumela re sa tsebane, e mong ho e mong. Ke khetlo la rona la pele re kopana, ho ea ka moo ke tsebang, 'na le uena, ha re tsebane. [Moena o re, "Ke etetse likopano tsa hao."—Mohl.] U kile ua etela likopano. Yaa. ["Empa ha ke eso kopane le uena."] O kile a etela likopano tsa ka, a rialo, empa ha a eso kopane le 'na. Ehlile, limilione li kile tsa etela likopano nke ke ka li tseba le ka mohla. Empa rona, joale banna ba babeli ba kopanang khetlo la pele bophelong ke bana. Ke monna ea emeng mono feela, ha ke mo tsebe. Bible ke ena; ha ke—ke mo tsebe, ha ke eso 'mone bophelong ba ka. O mpona, ho tsoa kae-kae har'a letšoele, ka kopanong kae-kae. Empa ke eo moo a emeng teng.

<sup>206</sup> Ekaba monna eo ke moikaketsi. Ekaba ke molumeli. Ekaba ha se molumeli ho hang, le ha nyenyane. Mohlomong ke monna feela. Mohlomong o a kula, mohlomong ha a kule. Mohlomong ke mathata a lelapa, mathata a lichelete. Mohlomong o emetse motho e mong mono. Ha ke tsebe. Empa ke eo o eme, 'me ke 'na enoa.

“Joale, benghali, re rata ho bona Jesu.”

<sup>207</sup> Joale, nka etsetsa monna eo eng? Joale, nka mo atamela, ka 'meha matsoho, ho re, “Na u a kula, monghali?” O ne a tla re, “E, monghali.” Ke behe matsoho a ka holima hae, ke re, “Khanya ho Molimo, allelua! Tsamaea, u tla fola. Allelua!” Be, joale, seo se ka bolela hore o tla fola; e itšetlehile ka seo a se nahanneng ka eona. Ho sa tsotelehe, e ka ba . . . Ke mo tsukutla le ho mo beha matsoho, ho ke ke ha etsa letho. Ke tumelo ea hae ho Molimo e ka e etsang. Empa, joale, o ne a tla ba le tokelo ea ho belaela seo.

<sup>208</sup> Empa ha Moea o Halalelang o ka ema mona oa 'molella ntho eo a bileng eona, joaloka ha Moshe a ngotse Genese, joale ruri O ne a ka 'molella se tlang ho etsahala. O ne a ka lumela seo, na a ka khona? Joale, joale haeba A ka etsa hoo, haeba Krete a ka etsa hoo, ba bakae ba lona ba tla lumela ka pelo eohle ea lona?

<sup>209</sup> Le a bona, joale le a bona, phoso e le 'ngoe eo ke e fumanang Amerika, ba bone tse ngata haholo ho fihlela ba fetoha babohi feela, ua bona. Se etseng joalo. U hlomphe Krete, u a bona. U se ke ua ntsotella. Ke moetsalibe ea pholositsoeng ka mohau. Empa joale ho sa tsotelehe Molimo o ka ntlotsa hakae, O tlameha ho mo tlotsa, le eëna. Ke hantle, e ke ke ea thusa ka letho. O tlameha ho mo tlotsa, le eëna. O tlameha ho u tlotsa, ua bona, ho u tlotsa kantle mane, Moea o Halalelang o tšolohele holim'a hao.

210 Ka hona, ona ke mochoporo feela. Ha u e bue u iqalla. O bua ka uena. Ke moemeli eo Molimo a mo sebelisang ho bua ka eëna, le a bona. Joaloka maekrofounu ona, maekrofounu oo o thotse haese ha ntho e bua motšeo mona ka 'ona. 'Me, ke 'na eo, ke tseba monna eo joang? Ha ke eso 'mone, empa ke semumu ho eëna. Ua bona?

211 Ka hona, “Monghali, re rata ho bona Jesu.” Joale O ne a tla etsa'ng? Ho ka thoeng holane monna eo a kula, ebe O re, “Ke tla u folisa?” O ne a ke ke a khona; O se a entse joalo. Le a bona? “Re folisitsoe ka maqeba a Hae.” O e entse Kalvari. Empa O ne a tla etsa ho hong ho supa hobane E sa ntse e le Messia. Na ho ne ho le joalo? Be, ka hona, O ne a tla etsa'ng, na O ne a tla re, “Sheba mehoabali ea Ka ea lithakhisa”? Ha se seo A se buileng tšimolohong. Ha A ka a . . . O ba boleletse feela se neng se lutse pelong tsa bona, le joalo-joalo, 'me ba tsebile hoba eo e ne e le Messia. Joale ke Eëna, maobane, kajeno, le kamehla. Na le a e lumela? E reng, “Amen.” [Phutheho e re, “Amen.”—Mohl.]

212 U re, “Moena Branham, u emetse'ng?” Lengeloi la Morena. Ehlile. Nke ke ka etsa letho. Ke Le emetse. E sa ntlotse, nke ke—nke ke ka bua letho. E itšetlehile feela ka seo. . .

213 Joale O teng mona. O teng mona joale. 'Me ka Lebitso la Jesu Krete ke beha moea o mong le o mong ka mona tlas'a taolo ea ka, bakeng sa khanya ea Molimo.

214 Ha ke u tsebe, monghali. Ha re tsebane. Empa u utloa ho hong. . . kapa u elelloa hoba ho hong hoa etsahala. Joale monna eo o ne a ke ke a pata bophelo ba hae. O a kula. Ho mo folisa, nke ke ka khona. Ha ho mokhoa oo nka mo folisang. Monna eo o tsoa e—e ngakeng. O hlahlobiloe. Ehlile, o mothating oa ho etsoa oporeishene. Ke hantle. Haeba e le 'nete, monghali, phahamisa letsoho la hau.

Na u a lumela?

Ho re, “U e hakantse, Moena Branham.” Ha ke a etsa joalo.

215 Sheba hape. Sheba ka nqa ena, monghali. Joalo ka ha Morena oa rona a bua le mosali, Ke Moea oa Hae. Ha ke Eëna. Ke motho ea joalo ka uena, empa Ke Moea oa Hae. Sohle seo A u boleletseng sona, se ne se lokile, eng kapa eng. Yaa, ke ena hape. E, e, o mothating oa ho etsoa oporeishene hona joale, 'me ke bothata ba senya le boemo ba tšoelesa ea senya. Hoo ke HO RIALO MOEA O HALALELANG. Ke hantle. Phahamisa letsoho la hau haeba ho le joalo. U a lumela joale hore u ka pel'a Sefahleho sa Hae? Ho lokile. E-ea, u lumela, 'me u tla fola. Amen.

U a lumela na? Joale ho bonolo hakaalo ho bona Krete a nka khato.

216 Joale, mofumahali, ha re tsebane. Mona ho na le. . . U tsoa kopanong. Ha ke re “u osele,” hoo ho bolela hore ha ke u tsebe, ha u ntsebe. 'Me ke. . . Le mpone likopanong, le lintho tse kang

tseo. Empa ho tseba, ho re, “E, Moena Branham, u tlike ntlung ea ka, ke a u tseba, re metsoalle,” Ha ke u tsebe ka mokhoa oo. ’Me u kile ua ba ka kopanong nqa e ’ngoe. Nke ke ka tseba letho, letho ka uena, ke tseba feela hore u mosali ea kileng a ba ka hare ho e ’ngoe, ho etela kopanong e itseng kae-kae. Joale, mono e ne le monna. Mona ke mosali.

217 Sena ke setšoantšo sa Santa Johanne 4, monna le mosali ba kopana lekhetlo la pele bophelong, ho kopana lifahleho li talimane, joalo ka mosali. . . mosali oa Samaria le Morena oa rōna Jesu. Joale mosali ke enoa, ha ke mo tsebe. Ha ke eso ’mone. Ke molata ka botlalo. Molimo Leholimong o tseba seo. Ha ke eso ’mone. Empa ha Moea o Halalelang o ka ’molella lebaka la hae mona, motho e mong kapa e ka bang eng, tsa lelapa, tsa lichelete, eng. . . kapa boloetse kapa seo e ka bang sona feela, joale o tla tlameha ho lumela hore ho na le Matla a ka holima hloleho mona ho etsa hoo. Na ho joalo?

218 Le a bona, joale e itšetlehile ho seo u nahanang hore Ke sona. U ka re “Belsebule” kapa u ka re “Kreste.” Uena, haeba u re “Belsebule,” u fumana moputso oa hae. Ua bona? Ho re “Kreste,” ke moputso oa Hae. U tšoanela ho lumela.

219 Joale e u beha sebakeng se se kakang! Na motho o batla ho nka sebaka see? Haeba le sa e lumele, tloong koano le nke malulo a ka hang. [Moena Branham o a khutsa—Mohl.] Khutso e aparela mokhgupi kamehla ha seo se botsoa.

220 Joale, khaitseteli, sheba nqa ena. Hobaneng ke u bitsitse “khaitseteli” ha ke qamaka? Ke ne ke u furaletse ka mokokotlo oa ka. Empa ka utloa Moea holima hau, hore u Mokreste. U molumeli. Ha ke u tsebe, empa ke a tseba u Mokreste. Hobane, Moea o holim’a hau, le Moea o holim’a ka, e a amana, u a bona. Uena, u ikutloa u amohetsoe, u a tseba, ho etsa hore O thabe feela, u amohetsoe.

221 Joale, haeba Moea o Halalelang, joalo ka Jesu ha a bua le mosali selibeng, ke rōna bana, ke ketsahalo e nyenyane joaloka e selibeng sa Sikare, seo ke neng ke bua ka sona. Joale, ereka ha bobeli ba rōna re le balumeli, ’me re eme mona, Moea o Halalelang o holim’a rōna ka bobeli. Joale O neile. . . Ha ke moreri. Empa O mpha neo; ke thero ea ka eo. Ke neo ea boporofeta. ’Me tseba ke tsa nakoana feela; ho tla qosa tumelo ea hau ho etsa hoo; joaloka mosali ea amileng seaparo sa Hae, ho re, “Tumelo ea hau e u pholositse,” le a bona. Joale, ke ntho e tšoanang le e nkang joale, u a bona, e qosa tumelo ea hau. Ebe O mpoletla ho hong, hore ke ee kae le libakeng tse itseng.

222 Joale, mona, O ne a hloka ho pota le ka Samaria. Joale ke tseleng ea ka e eang Alaska, empa ke ne ke tlameha ho pota ka mona. Hobaneng? Ke utloile ke tataisetsoa ho tla mona. ’Me ke mona; ke moo u tlike sefaleng sena. Ke phetho seo ke se tsebang. ’Me u eme mona. U Mokreste le ’na ke Mokreste, bobeli ba rona

ka Moea o Halalelang. 'Me Lentsoe la Hae ke lena, hore esale Eèna maobane, kajeno, le ka mehla.

223 Joale, ha A ka u senolela ntho e itseng bophelong ba hau, u tla tseba haeba e le 'nete kapa che. 'Me O tla etsa hore u lumele seo u se kopang; hobane Mokreste a ke ke a ema mono joalo, u a—u hloka ho hong ho seng joalo u ka be u sa ema mono.

224 Na motho e mong le e mong o tla lumela? Na motho o teng ea tsebang motho eo? Yaa, batho ba bangata ba tseba motho eo.

225 Be, ho latela lingaka, u loketse ho opereitwa, le uena. Ke mathopa. Ke hantle. Na u lumela Moea o Halalelang o ka ntšenolela moo mathopa ao a leng teng? Liphieo. Ke hantle. Joale na u a lumela? Ha u tsoe mona. U tlile koano bohole ba limaele tse ka bang makholo a mabeli kapa a mararo. U tsamaile tsela e telele ho fihla mona. Ke hantle. Ke hantle. 'Me, ebile, u mohatsa moruti. U a lumela Molimo a ka mpoella hore na u mang? Na e tla u thusa? Mof. Johnson. E-ea, u lumela, 'me u fole; le ka pelo ea hau eohle.

226 U lumela ka pelō eohle ea hau? Ua bona? Jesu Kreste! Benghali, re rata ho bona. . . U re, "Hoo ho joang?" Be, ha e fetise seo A se boleletseng ba bang bohle. Na u a lumela? "Benghali, re rata ho bona Jesu." Ke eèna. Joale e-ea u bue le mosali, u 'motse.

227 Joale monna ke enoa, osele ka botlalo, ha ke mo tsebe, ha ke eso 'mone bophelong ba ka. E ka ba u tšoaelitsoe ke mofetše, a ka ba le mathata a lapeng, a lichelete. Ha ke tsebe bothata ka eèna. O eme mona, monna feela. Joale ha Moea o Halalelang o ka senolela monna eo, le a tseba. . .

228 Mofumahatsana eo ea lutseng hantle morao mona moo ke supang ka monoana oa ka, u jeoa ke bothata ba letlalo. Ha u ka lumela ka pelō eohle ea hao! U a e lumela, mofumahali, ka pelō eohle ea hao? Mosajana ea hlooho-putsoa ea roetseng likhalase, o jeoa, o na le bothata ba letlalo. O ne a eme mono, kapa a lutse mono, ke rialo, a ntse a nahana ebe bothata ba hae ke bofe, a rapela pelōng ea hae. 'Me joale haeba e lokile, 'me u lumela hore Molimo u tla u folisa, ema ka maoto a hau.

229 O amme eng? Ke a le botsa, o amme eng? O bohole ba lijarete tse mashome a mabeli ho tloha ho 'na. O amme Moprasta e Moholo, 'me Moprasta eo e Moholo o teng mona! E sa le Eèna maobane, kajeno, le ka mehla. Ha le bone na? U se ke ua E belaela. E lumele! E ba le tumelo.

230 Joale, ha kea khona ho laola seo, monghali. Ke hore ke—ke sheba Leseli, oa bona, 'me Le ile la tloha ho 'na, 'me ka Le bona le leketlile koana mono, 'me ka bona mofumahatsana a nyolohela mona ka pel'a ka. 'Me a 'na a tla ka pel'a ka mona, 'me ke bona e le mosali sebakeng sa monna, kahoo ka tlameha ho bua feela ka seo ke neng ke se bona.

231 Oh, hola feela kereke ena, hola feela sehlopha sena sa batho se ne se ka lumela hona joale, 'me sa ba le tumelo feela, Ho ne ho tla etsahala'ng, ho ne ho tla etsahalang!

232 Monghali, ha re tsebane. Ke ne ke batlile ho bua le uena feela, ho hokana le moea oa hau feela. Mona, ha u a tlela uena mona. U tletse motho e mong mona, e leng e—e mothoana, moshanyana, o ile a lemala kotsing ea koloi, a khaoloa likotoana, a sehoa, maemo a mabe haholo, a nyarosang. U mona, u mo emetse sebaka. Ke hantle. Ha Molimo o sa thuse moshanyana, o tla hlokahala. Na u ka nketsetsa ka mohau? Ntša sakatuku seo mokotleng oa ka; eya, u se behe holima hae, ka Lebiso la Morena, 'me u se belaele. 'Me nke ke utloe ho tsoa ho eèna, ha kopano e tsoela pele. E ba le tumelo.

233 U phela joang, monghali? Ha re tsebane. Mosali e mong. Na u a lumela? Joale, hopola, O tšoana hantle kantle mono kamoo A leng mona. O hohle. O nqa tsohle.

234 Khaitseli Borders, na ke uena ea lutseng kantle mono? Ha ke khone ho bona hantle. Eakare e ne e le Khaitseli Borders ea lutseng moo. Nke ke . . . Roy, mohatsa Moena Roy Borders. Ke a kholoa ha ho joalo. E tlohile, ea ema holima mofumahali eo. Joale, motsotso feela, 'me mohlomong E tla boela e bitsa, ho bona seo E se entseng.

235 Ke molata ho uena. Morena o re tseba bobeli ba rona. Ha Morena a ka ntlhalosetsa, 'me a etsa ho hong mona, lebaka leo u leng mona ka lona, na u tla lumela ka pelō eohle ea hao? [Khaitseli o re, "E."—Mohl.]

236 Mof. Borders o lula a eme ka pel'a ka mona, kae-kae. Ke . . . Mof. Borders o teng kahar'a kopano kae-kae. (Ho na le phoso ka mohatsao?) Ho lokile, e lula e khutlela mona. 'Me ho na le sehlopha sa batho, motho pel'a hae, 'me ke ntse ke ipotsa.

237 U tšoeroe ke hlahala. Ke hantle. U a lumela hore Molimo a ka mpoella moo hlahala e leng teng? Holim'a noka. U lumela ka pelō eohle ea hao. U na le mathata, le uena, le lintho tse ling tse ngata. U a lumela. Ke hantle. U lumela ka pelō eohle ea hao? [Khaitseli o re, "E."—Mohl.] E-ea, u lumele joalo, 'me u tla . . . ho tla be ho felile, 'me Molimo o tla u folisa a u phekole. [Khaitseli o re, "Moena Branham, mosali eo o tlile le 'na, ka bothata ba letlalo, o tlile le 'na. 'Me ke ne ke sa tsebe ho fihlela re lula ka morao mono, a re o na le bothata ba letlalo."] Lea bona, o ile a thabela ho kena moleng oa thapelo mohlomong ke sona se entseng hoo, thapelo bakeng sa e mong ho e mong.

238 Ke ena! Oh, ke a bona! Ke bone Mof. Borders a eme mona. O ntse a rapela. 'Me ho na le e—e mosali e mong ea lutseng pel'a hae mono, ea rapelang, o na le khatello e tlase ea mali. Ha u lumela, u lutse hantle mono, mofumahali, u e lumela ka pelo eohle ea hau, 'me Molimo o tla u folisa, ka khatello e tlase ea mali. Amen. Ke moo. Ke hona moo thapelo e neng e tsoa teng.

239 Ha u lumela hore ke moporofeta, kapa, ntšoarele, mohlanka, (taba eo e khopisa batho), beha mosali ea lutseng pel'a hau letsoho, hobane o jeoa ke methapo ea vericose. Le a bona, ke hantle. Amen.

240 Lumela ka pelō eohle ea hau joale! Mpoelleng hore ba ba ama eng; mosali e mong e monyenyanane ea lutseng mono, a rapella e mong, e lula e hlaha kalaneng. Lumela feela ka pelō eohle ea hau! Ho lokile.

241 Tloo koano, mofumahali. U lumela ka pelo ea hao eohle? Na u a lumela? Na u a lumela hore bothata boo ba mala bo tla fola? [Khaitseteli o re, "E."—Mohl.] Tsamaea ke hona u je sophoro ea hao. Jesu Krete o a u folisa.

242 U lumela'ng? Na u a lumela hore Molimo o tla folisa bothata boo ba mokokotlo, liphieo tseo, le ho u phelisa? E-ea hae, u lumela, u re, "Jesu Krete o a mphelisa." E ba le tumelo feela, u se belaele.

243 Tloo, monghali. U ne u thabile haholo ha u tsoa moleng mono, ha palo ea hau e ne e bitsoa. Molimo o folisa bothata ba pelō 'me a ka u phelisa. Na u a e lumela? U ka ikela, u lumela, 'me e tla u lesa kaofela, 'me u tla—u tla fola. Ho lokile.

244 E ba le tumelo. U se belaele, Mofumahali, u nahana joang ka eona? Na u nahana hore ha nka u tšoara ka matsoho, u ka fola? Ke sa bue letho feela, ke mpa ke u tšoara feela? [Khaitseteli o re, "Ha ho hlokahale le hore u etse."—Mohl.] Tsoela pele. "Ha ho hlokahale," ho lokile, ke botle. Tsoela pele hantle. Amen. Ke eona tsela ea ho e etsa. Ho lokile.

245 Tloo, mofumahali. U lumela eng, khaitseteli? U lumela ka pelo eohle ea hau? Na u a tseba hore Molimo o ka mpoella se phoso ka uena, empa na u tla e lumela? Joale lefu la tsoekere ha se letho ho Molimo, A ka le folisa. Na ua lumela? Ho lokile, tsoela pele, u fole. Amen.

246 Ho lokile, monghali. Tloo, monghali. Ke osele ho uena. E mong le e mong o a u bolella, "Imamele," hobane u jeoa ke dinerefe. Empa u ke ke oa imamela, ntho e teng mono e u etsang dinerefe. Ke hantle. Empa joale u eme lethebeng moo e tlohileng ho uena. E-ea, e lumele, 'me ha e sa tla hlola e khutla. E-ea, u e lumele. Amen. E ba le tumelo. U se belaele. Ho lokile.

247 Lintho tse ngata, bothata ba bomme, ramatiki. Joale na u a lumela hore Molimo o tla u phekola? [Khaitseteli o re, "Amen."—Mohl.] Tloha feela, u ntse u re, "Ho bokoe Molimo," 'me—'me u lumele ka pelō eohle ea hao.

Tloo, mofumahali.

248 Na le a lumela kantle mono?

Molimo a ka folisa lefu la tsoekere, le eng e maling. Na u lumela seo? Ehlile, A ka khona. Ikele hantle, u lumela, u re, "Amen! Ho bokoe Morena!"

249 Na u a lumela, “Behang bakuli matsoho, ba tla fola”? Ka Lebitso la Morena Jesu, e-ea, u fole joale, 'me u lumele ka pelo ea hau eohle.


250 Ho lokile, tloo hantle, monghali. Na u a lumela hore Molimo a ka folisa bothata ba pelō; ho etsa hore mathata a porosetate, le tsohle, letšoho leo le tsohle li tlohe ho uena? Ikele ke hona, u e lumele ka Lebitso la Morena Jesu. Amen.

251 Na U lumela ka pelō eohle ea hao? Ho ka thoeng ka lōna bohle, na le a lumela?

252 Liritsa tsa lona li kae? Ke bona setulo sa bakuli. U reng, monghali? Sheba mona ho 'na. Na u a nkholoa? U a lumela hore ke mohlanka oa Molimo? U etsa joalo. Ntalime, ke hona. Ke hore, bothata ba hau bo meomong ea hau. U tlameha ho ea, sepetlele; empa u ne u sa batle ho e etsa, hoba u ne u hopotse hore ha u ka fihla mona le ka mohla, u tla fola, 'me u ke ke oa tlameha ho ea sepetlele. Ke hantle. Na u a e lumela? Haeba u lutse mono, ruri u tla shoa; joalo ka balepera. Ngaka e ke ke ea u thusa ka letho. Ka hona hobaneng u sa amohela Kreste bosiuong bona, le ho e lumela ka pelō eohle ea hau, 'me u eme setulong seo sa bakuli, le ho nka ntlha ea sona le ho sa sututsa, le ho tsoa ka monyako o ee hae, 'me u fole? Hobaneng u sa etse joalo? Na u tla e lumela? Ka hona tsoha. Se belaele. Ka Lebitso la Jesu Kreste, nka setulo sa hao sa bakuli 'me u ee hae!

253 Na u lumela ka pelō eohle ea hau? Ema ka maoto a hau, mang ea batlang ho folisoa. Ema ka maoto a hau, 'me u e lumele. Ema! Ha ke tsotelle se phoso ka uena, hore u holofetse hakakang. Ha e etse phapang ea letho. Ke a le phephetsa, emang! Phahama, e mong le e mong, seritsa se seng le se seng, hohle moo u leng teng. Ka Lebitso la Jesu Kreste, ema ka maoto a hau 'me u fole! Ke lona bao, letšoele lohle, le eme.

254 Joale ha re phahamisetseng matsoho a rōna ho Molimo. Ntate oa Leholimō, Monghali, re rata ho bona Jesu. Ke Uena enoa! Ha ho ea fokolang hara rona, e mong le e mong o folile. Re U leboha hakaakang, Ntate! Joale re a rapela, Molimo, hore U tla hlola liabolosi nako efe le efe joale, ho leleka ho se lumele hohle.

255 Satane, ka Lebitso la Jesu, tsoa letšoeleng lena, tsoa mona! U hlotsoe ke ntoa. Ka Lebitso la Morena Jesu Kreste, ba ke ba folisoa, e mong le e mong oa bona. 

62-0704 Re Rata Ho Bona Jesu  
Municipal Auditorium  
Grass Valley, California U.S.A.

SOUTH SOTHO

©2026 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Krete. Buka ena e ke ke ea rekisoa, ea boela ea hlalisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fua boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)